

清

史

稿

清史稿

列傳

藩部八

西藏

西藏禹貢雍州之域漢爲益州沈黎郡徼外白狼樂木諸羌地魏隋爲附國女國及左封昔衛葛延春桑迷桑北利模徒那鄂諸羌地唐爲吐蕃始崇佛法旣而滅吐谷渾盡臣羊同黨項諸羌西隣大食幅員萬餘里唐末衰弱諸部分散宋時朝貢不絕元世祖時置烏思藏納里速古魯孫等三路宣慰司都元帥府仍置管民萬戶諸官撫輯之以吐蕃僧帕克斯巴爲木寶法王帝師嗣者數世弟子號司空國公佩金玉印者甚衆明洪武年以攝帝師納木嘉勒藏博爲熾盛佛寶國師給玉印置烏斯藏指揮司及宣慰司招討司萬戶諸官多沿元舊以元國公納木喀斯丹拜嘉勒藏等領之尋改烏斯藏爲行都指揮司以班竹兒藏爲烏斯藏都指揮使自下皆令世襲未幾改烏斯藏俺不羅衛爲行都指揮司永樂中增置烏斯藏牛兒宋寨行都指揮司及必里上印部二衛復分封

番僧爲大寶法王大乘法王大慈法王闡教王闡化王輔教王贊善王護教王  
凡八王比歲或間歲朝貢宣德成化間又累加封號其地有僧號達賴喇嘛居  
拉薩之布達拉廟號前藏有班禪喇嘛居日喀則城之扎什倫布廟號後藏番  
俗崇奉又在諸番王之上西藏喇嘛舊皆紅教至宗喀巴始創黃教得道西藏  
噶勒丹寺時紅教本印度之習娶妻之子世襲法王專指密咒流極至以吞刀  
吐火炫俗盡失戒定慧宗旨黃教不得近女色遺囑二大弟子世以呼畢勒罕  
轉生演大乘教呼畢勒罕者華言化身達賴班禪卽所謂二大弟子達賴譯言  
無上班禪譯言光顯其俗謂死而不失其真自知所往其弟子輒迎而立之常  
在輪迴本性不昧故達賴班禪易世互相爲師其教皆重見性度生斥聲聞小  
乘及幻術小乘當明中葉已遠出紅教上達賴第一輩曰羅倫嘉穆錯吐蕃贊  
普之裔世爲番王二十歲至前藏宗喀巴以爲大弟子年八十四第二輩曰根  
登嘉木錯在後藏札朗轉世登布達拉色拉扎什倫布講經之坐年六十七三  
輩曰鎖設嘉木堅錯爲達賴中最著名者置第巴代理兵刑賦稅弟子稱呼圖

克圖分掌教化時黃教尙未行於蒙古元裔俺答兼併諸部侵掠中國用兵土伯特收阿木多喀木康等部落年老厭兵納其姪鄂爾多斯部碩克濟農諫往迎達賴勸之東還自甘州移書張居正求通貢饋萬曆年遂納鎖南堅錯之貢予封資達賴應俺答之迎至青海爲言三生善緣諸台吉言願自今將湧血之火江變溢乳之靜海俺答許立廟一在歸化城一在西甯於是黃教普蒙古諸部而藏中紅教之大寶大乘諸法王皆俯首稱弟子改從黃教化行諸部東西數萬里熬茶膜拜視若天神諸番王徒擁虛位不復能施號令年四十七四輩曰榮丹嘉穆錯年二十八五輩曰阿旺布藏嘉木錯初西藏其俗稱國曰岡伯特亦曰唐古特自達賴班禪外有汗則蒙古部長爲之時藏之藏巴汗與達賴所用第巴不協額魯特部和碩汗者名圖魯拜琿元太祖弟哈布圖哈薩爾十九世孫也後兼併唐古特四部改號顧實汗以青海地廣令子孫游牧而喀木康輸其賦衛地則第巴奉達賴居之藏地則藏巴汗居之第巴桑結與藏巴汗不相能謂其虐部衆毀黃教乞師於顧實汗剽滅之顧實汗遂以藏地居班禪

留長子鄂齊爾汗轄其衆次子達賚巴圖爾台吉佐之皆崇德年事也先是天聰年間大兵取明之東省天現明星祥瑞顧實汗曰此星係大力汗之威力星由是觀之非常人也於是遐邇蒙古共道太宗文皇帝爲和爾摩斯達額爾德穆圖博克達徹辰汗迨崇德二年奏請發幣使延達賴四年遣使貽土伯特汗及達賴書謂自古所制經典不欲其泯滅不傳故遣使敦請云嗣以喀爾喀有不果顧實汗復致書達賴班禪藏巴汗約共遣使朝貢達賴班禪及達言藏巴汗顧實汗遣伊喇固散胡圖克圖等貢方物獻丹書克稱太宗爲曼殊師利大皇帝曼殊者華言妙吉祥也使至盛京太宗躬率王大臣迓於懷遠門御座爲起迎於門闕立受書握手相見升榻設座於榻右命坐賜茶大燕於崇政殿間五日一宴命王貝勒以次宴留八閱月乃還八年報幣於達賴曰大清國寬溫仁聖皇帝致書於金剛大士達賴喇嘛今承喇嘛有拯濟衆生之志欲興扶佛法遣使通書朕心甚悅茲候恭安吉凡所欲言令察罕格龍等口授復貽書於班禪及紅帽喇嘛濟東胡圖克圖等亦如之是爲西藏通好之始於是圖化王

及河州弘化顯慶二寺僧天全六番烏斯藏董卜黎州長河西魚通寧遠泥溪  
蠻彝沈村寧戎等土司莊浪番僧先後入貢獻前明敕印請內附矣明年世祖  
定鼎燕京混一字內順實汗復奏達賴功德無量宜延至京令其誦經咒以  
資福佑乃遣使往迎順治四年達賴班禪各遣使獻金佛念珠表頌功德五年  
遣喇嘛席喇布格隆等齋書存問達賴並敦請之達賴覆書許於辰年朝覲九  
年十月達賴抵代噶命和碩承澤王嗣塞等往迎十二月達賴至謁於南苑賓  
之於太和殿建西黃寺居之達賴尋以水土不宜告歸賜以金銀鞍幣珠玉鞍  
馬慰留之十年二月歸復御殿賜宴命親王碩塞偕貝子順爾瑪洪吳達海率  
八旗兵送至代噶命禮部尙書覺羅朗球理藩院侍郎達席禮齋金冊印於代  
噶封達賴爲西天大善自在佛所領天下釋教普通瓦赤喇怛喇達賴喇嘛達  
賴歸興黃教重建布達拉及前藏各寺院六十二處又創修喀木康等處廟計  
三千七十云是時順實汗先卒達賴又年老大權旁落於第巴桑結桑結詭遣  
內安局人冒闖化王貢使實則闖化王久經殘破廢爲喇嘛而屢次進貢仍書

王名并請換敕印廉得其實斥之吳三桂王雲南歲遣人至藏熬茶康熙十三年三桂反詔青海蒙古兵由松潘入川桑結使達賴上書尼之且代三桂乞降及大兵圍吳世璠於雲南世璠割中甸維西二地乞援於藏其書爲貝子章泰軍所獲朝廷但駐守中甸末深問也康熙二十一年在布達拉寺間寂年六十當五世達賴之卒也第巴桑結以議立新達賴故與拉藏汗交惡桑結既以已意立羅布藏仁青策囊嘉錯爲六世達賴乃秘不發喪僞言達賴入定居高閣不見人凡事傳達賴命行之自是益橫既和準噶爾以殘喀爾喀蒙古復唆準噶爾以鬥中國又外構策妄阿拉布坦內鬩拉藏汗遂招準兵寇藏之禍凡西北擾攘數十年皆第巴一人所致噶爾丹者亦四額魯特之一曾入藏爲喇嘛與第巴睚眦其汗自言受達賴封爲準噶爾博碩克圖汗又喀爾喀蒙古以入藏隔於額魯特乃自奉宗喀巴第三弟子哲卜尊丹巴胡圖克圖之後身爲大胡圖克圖位與班禪亞凡數十年矣至喀爾喀車臣汗與土謝圖汗構兵聖祖遣使約達賴和解之桑結奏使噶爾丹西勒圖往蒙語刺麻坐牀者爲西

勒圖達賴大弟子也而哲卜尊丹巴胡圖克圖亦奉詔莅盟壇與噶爾丹西勒圖抗禮噶爾丹使其族弟隨之觀釁因責喀爾喀待達賴無加禮詬責之爲土謝圖汗所殺噶爾丹遂以報仇爲名襲侵其部落喀爾喀集衆議投俄羅斯與投中國孰利哲卜尊丹巴曰俄羅斯持教不同必以我爲異類宜投中國興黃教之地遂定計東走聖祖申命桑賴遣使罷兵桑結使濟隆胡圖克圖往反陰嗾之二十九年遂入寇漠南我兵敗之烏闌布通噶爾丹託濟隆代乞和頂威靈佛立誓而遁桑結內慚乃託達賴意合青海蒙古及額魯特各台吉上尊號聖祖不受詔曰朕興達賴期于撫育衆生而所遣堪布等故違意旨以到喀爾喀額魯特兩傷如能令其修和朕方欲加達賴嘉號此皆任事行人不能仰副朕心及達賴意致喀爾喀殘破額魯特喪敗朕心實爲隱痛復何尊號之可受乎來使貢物其發還屢達京師喇嘛入藏探之三十四年達賴入貢言已年邁國事決第巴乞錫封爵詔封第巴桑結爲土伯特國王三十五年聖祖親征噶爾丹至克魯倫河噶爾丹敗竄慰其部下曰此行非我意乃達賴使言南征大



吉是以深入上謂達賴存必無是事乃遣使第巴桑結書曰朕詢之降番皆言達賴脫縉久矣爾至今匿不奏聞且達賴存日塞外無事者六十餘年爾乃屢唆喇爾丹興戎樂禍道法安在達賴班禪分主教化向來相代持世達賴各果厭世當告諸護法主以班禪主宗喀巴之教爾乃使衆不尊班禪而尊己又阻班禪進京朕欲和解準噶爾部爾乃使有虧行之濟隆以往烏闌布通之役爲賊軍卜日誦經張蓋山上觀戰勝則獻哈達不勝又代爲講欺以誤我追師繫爾祖庇噶爾丹之由今爲殄滅準夷告捷禮以噶爾丹佩刀一及其妻阿奴之佛像一佩符一遣使賚往可令與達賴相見令班禪來京執濟隆以畀我如其不然朕且檄雲南四川陝西之師見汝城下汝其糾合四額魯特人以待其母悔桑結惶恐明年密奏言爲衆生不幸第四世達賴於壬戌年示寂轉生靜體今十五歲矣前恐唐古特民人生變故未發喪今當以丑年十月二十五日出定坐牀求大皇帝勿宣泄至班禪因未出痘不敢至京濟隆當竭力致之京師乞全其身命戒體并封達賴臨終尸鹽非像聖祖許爲秘之待十月宣示內外

而第巴使者歸途遇策妄那拉布坦會噶爾丹之兵復宣言達賴已厭世爾部落兵毋得妄行策妄阿喇布坦哭而歸聖祖以第巴始終反覆持兩端乃追還其使傳集各蒙古宣示密封則像首已墮第巴使僇仆於地桑結忌策妄阿喇布坦盡收準部故地致噶爾丹無所歸奏防其猖獗而策妄阿喇布坦亦奏第巴奸譎及所立新達賴之僞欲藉詞侵藏聖祖以二人皆叵測不之許也四十四年桑結以拉藏汗終爲己害謀毒之未遂欲以兵逐之拉藏汗集衆討誅桑結詔封爲頭法恭順拉藏汗因奏廢桑結所立達賴詔送京師行至青海道死依其俗行事悖亂者拋棄屍骸卒年二十五時康熙四十六年也論者謂達摩創法震旦有一花五葉之識至六世啓衣鉢之爭故六祖不復傳衣鉢與宗喀巴至第六世達賴之事若一轍天數所極佛法不能違而況第巴詐僞出之以尊己擅權卒釀拉藏汗準噶爾相尋之禍六韋羅布藏噶爾桑嘉穆錯於康熙四十七年在裏塘轉世生有異表右臂紋如法輪七歲與衆喇嘛談經均莫能難蓋有夙慧也五十三年蒙古諸台吉等遣兵取道德格迎至青海坐牀初

拉藏汗既奏廢羅布藏仁吉策養嘉穆錯別立博克達山之呼畢勒罕阿旺伊什嘉穆錯爲達賴聞其名忌之將以兵戕之其父索諾木達爾扎薩負走乃免青海衆台吉以不辨眞僞爭詔遣官率青海使人往視拉藏汗奏前解僞達賴時曾奉旨尋眞達賴訪得博克達山胡畢勒罕以班禪言坐牀廷議以呼畢勒罕內幼俟再閱數年給封又以拉藏汗與青海台吉不睦遣侍郎赫壽協理藏務是爲西藏設官辦事之始然猶不常置也四十九年班禪拉藏汗會同管理藏務赫壽奏阿旺伊什嘉穆錯熟諳經典青海台吉信之請給冊印詔依其請而青海實不之信與藏中所奏互相是非聖祖恐其構釁詔羅布藏噶爾桑嘉穆錯徙至京不果行復令送紅山寺繼請送西甯宗喀巴寺青海貝勒察罕丹津等復尼之且以兵脅異己者詔大兵護送乃居宗喀巴寺聖祖以拉藏汗年近六旬一子青海駐紮一子策妄阿喇布處就婚恐託詞愛婿羈留不歸勢頗孤危况自殺第巴彼處人難保不生猜忌額魯特秉性多疑又甚疏忽倘事出不測相隔萬里救之不及詔令深謀防範五十六年策旺阿喇布坦遣台吉策

喀敦多布等率兵六千徒步繞戈壁逾和闐南大雪山涉險冒瘴晝伏夜行赴  
阿里克陽言送拉藏汗長子噶爾丹忠夫婦歸拉藏汗不知備賊至達木始覺  
偕仲子索爾扎拒交戰兩月不敵奔守布達拉始來疏乞援賊誘噶卜倫沙克  
都爾扎卜將小招獻降唐古特台吉納木扎勒等開布達拉北城入戕拉藏汗  
拘其季子色布騰及宰桑等搜各廟重器送伊犁禁阿旺伊什嘉穆錯于扎克  
布里廟索爾扎率兵三十人潰走爲所擒其妻問道來奔詔優養之西安將軍  
額倫特率西寧松潘打箭爐噶斯丹會同青海諸台吉及土司屬下赴援至喀  
喇河遇伏敗歿賊復誘裏塘營官喇嘛歸藏於是巴塘察木多乍雅巴爾喀木  
皆爲所搖惑矣尋詔都統法喇移打箭爐兵屯裏塘護呼畢勒罕復令索諾木  
達爾扎傳諭營官喇嘛將抗不就撫者誅之傳檄巴塘察木多乍雅各籍其土  
及民數遂進屯巴塘策凌敦多卜懼返所掠而兵自巴爾喀木歸言唐古特有  
瘴癘浮腫難久處青海蒙古皆憚進藏懇恩達賴奏可隨地安禪興大兵恐擾  
衆王大臣懲前敗亦皆言藏地險遠不決進兵議聖祖以西藏屏蔽青海川滇

若準夷盜據將邊無寧日且賊能衝雪絕險而至何況我軍策凌敦多卜聞我師至自必望風遠遁俟定立法教後或暫留守視或久鎮其地唐古特衆皆爲我兵準夷若再至以逸待勞何難剿滅安藏大兵決宜前進詔封羅卜藏噶爾桑嘉穆錯爲宏法覺衆第六輩達賴喇嘛命皇十四子允禔爲撫遠大將軍屯青海之木魯烏蘇治軍餉平逆將軍延信出青海定西將軍噶爾弼出四川兩路擣藏藏人亦知青海達賴之眞藏中舊立之贗合詞請於朝乞擁置禪榻詔許給金冊印於是蒙古汗王貝勒台吉各自率所部兵或數百或數千隨大兵扈從達賴入蒙策零敦多布由中路自拒青海軍分遣其宰桑以兵三千六百拒南路將軍噶爾弼招撫裏塘巴塘番衆進至察木多奪洛隆宗嘉玉橋之險旋奉大將軍檄俟期並進噶爾弼恐期久糧匱用副將岳鍾琪以番攻番計招土司爲前馳集皮船渡河置擣拉薩降番兵七千宣諭大小第巴及喇嘛封達賴倉庫分兵塞險扼賊餽道而青海亦三敗其中途劫營之賊斬俘千計額魯特進退受敵遂大潰不敢歸藏由克底雅北竄崎嶇凍餒得還伊犁者不及半

五十九年九月十五日達賴至布達拉坐牀出阿旺伊什嘉穆錯於禁所發回京師廢之盡誅額魯特喇嘛之助逆者留蒙古川滇兵四千命公策旺諾爾布總統成藏額駙阿寶都統武格參贊軍務以藏遣臣空布之第巴阿爾布巴首向效順同大兵取藏阿里之第巴康濟鼐截擊噶爾回路俱封貝子隆布奈親身歸附授輔國公理前藏務頗羅鼐授扎薩克一等台吉理後藏務各授噶卜倫於是裏塘所屬之上下牙色巴塘所屬之桑阿壩林卡石等番次第歸順郭羅克之吉宜卡納務押六等寨先後勦撫矣雍正元年召回允禔等撤駐藏防兵設戍於察本多二年青海喇嘛助羅卜藏丹津之叛青海諸寺喇嘛衆各數千羣起騷動章嘉胡圖克之呼畢勒罕拒戰於郭隆寺察汗諾們汗亦黨賊助戰石門寺喇嘛陽稱投順陰肆劫掠夾木燦堪布將竄藏年羹堯等討平之世宗謂玷辱宗門莫斯爲甚乃收各寺明國師禪師印并定廟舍毋逾二百楹衆毋逾三百人五年七月阿爾布巴隆布奈扎爾鼐特與達賴姻爭貝子康濟鼐之權聚兵害之欲投準噶爾詔吏部尙書查朗阿率川陝滇兵萬有五千進討

未至而台吉頗羅鼐率後藏及阿里兵九千自潘玉口至喀巴先遣兵千餘衝破喀木卡倫與隆布奈兵交綏夜西藏斥堠俱歸順頗羅鼐卽率兵直抵拉薩駐藏大臣馬喇僧格往布達拉護達賴各寺喇嘛將阿爾布巴等擒獻送馬拉所查朗阿至誅首逆及其孥詔以頗羅鼐爲貝子總藏事賜犒兵銀三萬兩留大臣正副二人領川陝兵二千分駐前後藏鎮撫是爲大臣駐藏三年一代之始收巴塘裏塘隸四川設宣撫司治之中甸維西隸雲南設二廳治之是年策妄阿喇布坦死子噶爾丹策零立請赴藏熬茶又聲言欲送還所虜拉藏汗二子詔嚴兵備之移達賴於裏塘之惠遠廟八年遷於泰寧護以兵千每年夏初西藏官兵赴防北路騰格里海之隘以備準夷冬雪封山撤兵蓋通準夷之路有三其極西山葉爾羌至阿里山隔大山迂遠易備其東路之喀喇河又有青海蒙古隔之中路之騰格里海逼近衛地故防守猶要并以頗羅鼐子珠爾默特策布登統阿里諸路兵保唐古特授爲扎薩克一等台吉追念康濟鼐前勦無嗣以其兄噶錫色布登喇布陣亡阿里封其子噶錫巴納木札勒色布騰

爲輔國公尋授噶布倫達賴之父索諾木達爾扎亦授輔國公晉頗羅鼐貝勒  
十年拉達克汗德忠納木札納奏臣理國事尊釋教值準噶爾情輒以告優詔  
答之準噶爾請和詔果親王偕章嘉胡圖克圖送達賴由秦寧歸藏減戍藏兵  
四之三章嘉胡圖克圖爲達賴請巴塘裏塘潯前藏以其爲達賴所降生諸土  
司建寺安禪制最宏麗也詔以其地商稅年銀五千兩賜之地仍內屬十一年  
以頗羅鼐勤勞懋著預保子襲郡王爵頗羅鼐子二長珠爾默特策布登病足  
次珠爾默特納木札勒兄弟互讓而頗羅鼐愛少子請以次子爲長子允之又  
嘉長子之讓詔封鎮國公仍鎮守阿里頗羅鼐善服衆爲諸噶卜倫所敬事有  
綏奔喇嘛扎克巴達顏者書其名歷祖之事覺頗羅鼐欲弭變輕議其罪溫諭  
嘉獎謂鎮壓左道不足患其偕達賴協輯唐古特衆準噶爾使再入藏熬茶駐  
藏副都統傅清等遣員率喀拉烏蘇兵監視頗羅鼐以暴疾亡以珠爾默特納  
木札勒襲爵兼理噶卜倫以班第達協理藏務世宗恐其少不更事未能服衆  
或以綏奔喇嘛扎克巴達顏故與達賴構隙不肯衆起而問之不無滋事虞諭



傳清留意體察而卒有乾隆十五年珠爾默特納木札勒之變時準噶爾台吉策妄多爾濟納木札勒復遣使赴藏熬茶入寺詭避痘以已卒守門不令官兵從詔以準噶爾狡甚飭嚴防雖歸巢勿稍忽而珠爾默特納木札勒以駐藏大臣不便於己乘機奏藏地靜謐請撤駐防兵廷議以不從撤兵請適足滋疑不如示之信詔可諭達賴勿令準噶爾入藏雖固請弗允珠爾默特納木札勒又詭稱準噶爾襲屠古特至碩翁圖庫爾遣兵備喀拉烏蘇徙達木番衆不數旬揚言準噶爾至阿哈雅克自率兵往備駐藏提督索拜遣旺對赴喀拉烏蘇備之比至無蹤有詔撤喀拉烏蘇兵及達木番歸牧勿惑衆初郡王頗羅鼐以女妻班第達至是班第達察珠爾默特納木札勒有逆志不之附珠爾默特納木札勒惡之奪其孥駐藏副都統紀山劾珠爾默特納木札勒妄戾請檄其兄協理藏務高宗不允諭紀山善導之勿露防範迹已而珠爾默特納木札勒以珠爾默特策布登布發阿里兵擾藏告蓋計陷之也因諭傳清曰珠爾默特納木札勒年幼躁急性好滋事若果無他故兄欲進兵至藏是特兄弟互相侵犯耳

若其兄並無此事而造言誣構則宜相機辦理十五年珠爾默特納木扎勒以兵戕其兄珠爾默特策布登于阿里詭以兄暴疾聞請收葬并育兄子時其兄子朋素克旺布及珠爾默特汪扎勒皆居後藏珠爾默特納木扎勒以兵往戕朋素克旺布陽稱逃亡珠爾默特旺扎勒依班禪爲喇嘛乃免傳清拉布敦以珠爾默特納木扎勒携兵離藏告蓋是時珠爾默特納木扎勒既襲殺其兄復通書餽物準噶爾請兵爲外應私携廠至後藏誣籍噶卜倫班第達及第巴布隆贊等旋達木距前藏三百餘里擁衆二千餘不歸奏至詔俟副都統班第自青海赴藏討罪復諭四川總督策楞提督岳鍾琪馳兵往會而賊勢猖獗驛道梗塞軍書不通者旬日傳清偕拉布敦計不急誅必據唐古特爲變召珠爾默特納木扎勒至待諸樓甫登起責其罪曰爾違天子令且忘爾父無君無父罪不可赦傳清趨前扼其臂拉布敦拔佩刀刺之諭脅從罔治有羅卜藏扎什者趨下呼賊千餘突至聚圍樓集焚焚達賴遣番僧往護不得入傳清拉布敦死之上嘉憫傳清等靖逆遇害均追贈一等伯特建雙忠祠以祀班第達奔守達

賴集兵拒逆卽命班第達以輔國公攝噶卜倫分其權而總其成於達賴設噶  
布倫四戴琫五第巴三堪布三分理藏務隸駐藏大臣及達賴轄增駐防兵千  
有五百戍藏以達木番歸駐藏大臣轄視內地例設佐領驍騎校各職并於準  
噶爾通藏隘設汛嚴防二十二年蕩平伊犁始永無準夷患是年達賴在布達  
拉闊寂時年五十七輩羅布藏降自嘉穆錯擺桑布於乾隆二十三年在後藏  
拖結熱拉岡出世二十七年迎至布達拉坐牀三十年由班禪班熱伊喜傳授  
小戒三十三年親至前藏攢招隨登色拉布資棚噶勒丹三大寺講經之座四  
十二年山班禪傳授格隆大戒四十六年頒給勅書金冊金印賞達賴之兄索  
諾木達什輔國公四十八年頒玉冊玉印凡遇國家慶典准其鈐用其尋常奏  
書文移仍用原印五十三年廓爾喀侵犯藏境初第六輩班禪之歿及京歸舍  
利於藏也凡朝廷所賜資在京各王公及內外各蒙邊地諸番所供養無慮數  
十萬金而寶冠瓔珞念珠晶玉之鉢鍍金之袈裟珍慶不可勝計其兄仲巴呼  
圖克圖悉諾爲己有既不布施各寺番兵喇嘛等亦一無所與其弟瑪爾巴垂

涎不遂憤唆廓爾喀籍商稅增額食鹽糴土爲詞興兵擾邊唐古特私和廓爾喀朝廷所遣之侍衛巴忠成都將軍鄂輝總兵成德等實陰主其議令堪布等許歲幣萬五千金於是廓爾喀飽颺而去巴忠等以賊降飾奏諷廓爾喀噶箕入貢受封國王五十四年七月廓爾喀遣人至藏表貢並致駐藏大臣書請如前約鄂輝恐發覺私許之欺屏不奏次年藏中幣復爽約五十六年七月廓爾喀復大入寇占據站拉木誘執噶布倫丹津班珠爾以歸八月復占據濟隴保秦等遷班禪于前藏廓匪進擾薩加溝遂至扎什倫布仲巴呼圖克圖遁九月都司徐南騰堅守官寨廓匪大掠扎什倫布財物以歸巴忠扈從熱河聞變沈水死鄂輝成德奉命赴藏剿禦皆逗留不進十月保秦等請移達賴班禪於秦甯上嚴斥之而嘉達賴之拒其議命嘉勇公福康安爲將軍超勇公海蘭察爲參贊大臣率索倫達呼爾兵及屯練土兵進討其軍餉則藏以東四川總督孫士毅主之藏以西駐藏大臣和琳主之濟隴邊外則前督惠齡主之五十七年正月鄂輝等始復站拉木二月帕克哩營官率番兵收復哲孟雄宗木地方是

月陷冠之第巴博爾東自陽布回藏唐古特私許歲幣事覺詔以保泰雅滿泰  
隱匿不奏革責枷號三月授福康安爲大將軍逮仲巴呼圖克圖于京四月添  
調川兵三千赴藏閏四月福康安自定日進兵趨宗喀五月克搭木復濟隴是  
月十五克熱索橋遂入廓境二十四克魯布魯碣卡六月福康安海蘭察等進  
攻東覺並雅爾賽拉博爾東拉諸處皆克之成德等亦攻克扎本鐵索橋六月  
廓曾拉特納巴都爾迭遣大頭人乞降送出川津班珠爾及前俘之兵七月福  
康安攻克噶勒拉堆補木奪橋渡河深入廓境七百餘里將迫其都陽布都統  
銜斐英阿等陣亡成德亦進克利底大山賊卡廓曾復呈繳唐廓前立合同獻  
所掠扎什倫布財物及沙瑪爾之屍八月廓爾喀遣使進貢福康安以廓爾喀  
屢請投誠奏入奉旨受降時以廓境益險八月後卽雪大封山因允所請於是  
福康安率大兵凱旋撤回藏議定善後章程駐藏大臣與達賴班禪平等噶布  
倫以下由駐藏大臣選授前後藏番歸我設之遊擊都司節制訓練自行設鎗  
鼓鑄銀幣設糧務一員監督之至是我國在藏始具完全之主權初達賴班禪

及各大呼圖克圖之呼畢勒罕出世均由垂仲降神指示往往徇私不公爲世  
詬病甚至哲卜尊丹胡圖克圖示寂適土謝圖汗之福晉有妊衆卽指爲呼畢  
勒罕及彌月竟生一女尤貽口實而達賴班禪親族亦多營爲大呼圖克圖以  
專財利致有仲巴兄弟爭利唆廓夷入寇之禍而達賴兄弟孜仲綏綯等充商  
卓特巴肆行舞弊占人地畝轉奉不敬黃教之紅帽喇嘛令與第穆呼圖克圖  
濟隴呼圖克圖同坐且與衆喇嘛歛取銀兩並將商上物件暗中虧缺來藏熬  
茶人應得路費皆減半發給有傷達賴體制因之特來參見者日減殊失人心  
高宗乘用兵後特運神斷創頒金奔巴瓶一供於藏之大招遇有呼畢勒罕出  
世互報差異者各書名於牙籤封固納諸瓶中誦經三日大臣會同達賴班禪  
於宗喀巴佛前啓封掣之至扎薩克蒙古所奉之呼圖克圖其呼畢勒罕亦報  
名理藩院與駐京之章嘉呼圖克圖或喇嘛印務處掌印掣定瓶供雍和宮而  
定東科爾入官之限嘉慶九年十月達賴有疾命成都副都統文弼帶醫馳往  
看視未抵藏達賴已於是月在布達拉圓寂年四十有七八輩阿旺隆安嘉穆

錯擺桑布於嘉慶十年在康巴墊曲科轉世年二歲異常聰慧早悟前身奉特旨卽定爲呼畢勒罕毋庸入瓶簽掣十三年九月迎至布里拉坐牀賞達賴之叔洛桑捻扎朗結頭品頂戴十八年由班禪傳授小戒時達賴幼穉噶卜倫乘機舞弊將達賴莊屋侵占並將辦事人隨事更換蒙賊自肥公肆劫掠命成都副都統文弼西甯辦事大臣玉崑馳藏查辦并究噶卜倫策拔克與成林互訐經訊噶卜倫策拔克率意更定章程四條以內地治理民人之法概行禁止致邀衆怨成林挪移庫欸分別斥革發伊犁烏魯木齊効力贖罪此藏事之內潰也至外事之勢亂則廓爾喀噶箕乃爾興戕其王被誅逆黨熱納畢各嘯竄逃至唐古特又與披楞開戰求達賴班禪助欸布魯克部長曲扎曲勒請賞王爵文弼匿不奏聞帕克哩營官勒索其進關貨物逞兇肇釁哲孟堆部請賞唐古特莊田并定邊界緬甸國男婦私與藏中胡圖克圖文件往來藏事已岌岌可危矣二十年二月在布達拉圓寂年十一歲九輩阿旺羅布藏降擺丹增楚稱嘉穆錯擺桑布於道光二年三月晦奏明在大招金奔巴瓶內掣定八月迎至

布達拉坐牀遺章嘉胡圖克圖由京馳藏照料奏定噶勒丹錫埒圖薩瑪第巴克什爲正師傅噶勒丹舊池巴阿旺念扎及榮增班第達甲木巴勒伊喜丹貝嘉木磋爲副師傅尋以傳授達賴經典三年有餘其未得諾們汗之榮增班第達亦賞給諾們汗賞達賴之父羅布藏捻扎頭品頂戴十四年由班禪傳授格隆大成十五年博窩滋事生番降設曲木多寺四品番目管官一宿回宗斯伊沃有茹寺三處六品番目各一宿木宗普龍寺湯堆批批三處七品番目各一藏西南徼外省哲孟雄者唐古特之屏藩也自五輩達賴以來因其崇信黃教歸達賴管轄乾隆五十六年駐藏大臣奏哲卜雄作木郎二部落每與達賴班禪通書訊惟不聽藏中調遣被廓爾喀侵占已有十年經福康安檄令協勦奪回侵地藉稱天熱畏懦不前迨聞廓爾喀歸順復思藉天朝威勢斷還六輩達賴所定舊界經福康安等駁斥畫分邊界不能自由入藏而夏秋之間該部落因地方炎熱仍准其來卓木曲批避暑于七輩達賴時曾將唐古特界內卓木曲批迤西尊扎之莊田賞給作爲養贍歷年自行征收錢糧青棵卓木之民常



至哲孟雄往來貿易其部長之妻亦唐古特人常遣人赴廓部長住所距藏僅十一站至卓木曲批避暑處在帕克哩以外與藏僅隔一山不三站設有鄂博並無要隘相安無事者有年自不准赴藏而始有請求給地之奏及請賞卓木雅納綽之民不得已有請賞給帕克哩營官之缺前藏商上向與後藏商卓特巴齟齬時噶勒丹錫勒圖蔭瑪第巴克什尤爲貪奸不公不法凡後藏代其陳請者輒責其貪鄙無知文幹等飭噶卜倫嚴斥謂無妄求管理藏地所屬職官民人之理并定八年來藏一次之限廷臣又知詳情允之文幹等僅行文藏內文武嚴查而不敢譯旨欽尊蓋恐一經宣布部長必有理申明也而其部長每歲遣請赴藏熬茶及入藏避暑如故迨道光四年松廷等始將前奉諭旨專扎明示並隨時嚴行駁飭五年班禪據報詳情謂哲孟雄部長楚普郎結訴稱自不准赴界上年人民病斃者一千有餘再達賴坐牀已逾數年各部落俱得赴藏朝見而舊所屬之人獨抱向隅實無面目見其部民於是始准其暫居避暑仍令帕克哩營官防範稽查在當時文幹誤聽前藏一面之詞不查實情率行

具奏文幹等既知困難有失字小之道而猶遷就其詞准其來藏熬茶一次蓋以準噶爾視哲孟雄而哲孟雄離心離德甘爲印度屬地至有捻都納之敗而西藏之門戶洞開矣十七年在布達拉圓寂年二十二第十輩阿旺改桑丹貝卓密凱珠嘉穆錯於道光十八年九月朔在噶達轉世二十一年五月奏明在金奔巴瓶內掣定由班禪披蓋授戒賞其父策旺頓柱公爵十月拉達克部落勾結生番佔踞藏境一千七百餘里奪據達壩噶爾及雜仁三處營寨經駐藏大臣派戴琿等率兵攻勦并將矛手番兵改挑槍兵收復補仁營寨又噶爾布倫等帶兵四面夾攻殄斃森巴及拉達克大小頭目四十餘賊匪二百餘拉達克頭人八底部長乞降公稟投歸唐古特商上願繳所占凡湯及達壩噶爾四處營寨並准堆噶爾本乞金番民酌定五百名由前後藏番民內擇精壯派往充當金夫派戴琿一如琿二甲琿二定駐守教習技藝二十二年四月由前藏迤東日申寺迎至布達拉坐牀二十四年以濟隴呼圖克圖阿旺羅布藏丹貞嘉木錯爲正師傅以降孜曲結喇嘛羅布藏冷竹布爲副師傅駐藏大臣琦善

奏參噶勒丹錫埒圖薩瑪第巴克什諾們汗阿旺扎木巴勒楚勒齊木巴什擅作威福貪黷營私所有被控各款訊擬結奏聞經理藩院議得已革諾們汗阿旺扎木巴勒錯齊木洮州夷僧本係入冊檔一微末喇嘛自其前輩歷受三朝重恩在雍和宮傳經旋命赴藏坐宗喀巴牀派充達賴師傅勅封諾們汗薩瑪第巴克什名號遞加衍宗喇嘛教靖遠懋功禪師又加賞達爾汗屢頒御書匾額以榮之宜如何清潔潛修公正自矢乃不知知守分膽敢需索番屬財物侵占百姓田廬私拆達賴所建房屋擅用未蒙恩賞輻輳更強據商產隱匿逃人鈐用印信不在公所進呈貢物不出已資濫支濫取任性聽斷恣意侵凌甚至達賴起居不能加意照料房內服侍無人以致達賴頸上帶傷流血不止始則忽而不防繼且知而不問蓋當達賴受傷時隨侍只森琿一人此森琿卽爲該諾們汗之隨侍近兩輩之達賴每屆接辦印務以前輒卽圓寂不得安享遐齡其中情節殆有不可問者卽放一扎薩克喇嘛勒取財物盈千累萬猶屬駭人聽聞詔令將歷得職銜名號全行褫革追勅剝黃名下徒衆全行撤出廟內查封

發往黑龍江安置所有財產查抄變價賠修藏屬各廟宇旋命釋回交地方嚴加管束復指輸銀兩請回前藏又因廓爾喀軍事請求開復回藏均嚴旨不允迨同治初元病歿土爾扈特旗准其留葬不准轉世門徒二十三人留於該旗游牧至光緒初年土爾扈特王復請指輸鉅款代求轉世始曲允其已轉世之呼畢勒罕得令爲僧琦善尋奏改章程二十八條又奏罷稽查商上出入及訓練番兵成例故事商上出入所有一切布施金銀均按季奏報自琦善奏定後而中國御藏之財權失又駐藏大臣及兵丁俸餉向由福康安在廓爾喀經費內撥交商上生息以資公用及琦善議改章程將生息收銷一切由商務供給迨後中國駐藏一切開支藏人漸各供給而不知當日實有資本發商生息并非向商上分肥總之乾隆所定制蕩然無存矣是年十二月敕諭第十一輩達賴喇嘛曰咨爾達賴喇嘛朕撫綏寰宇敷錫兆民期一道以同風冀九垓之徧德亦賴洪宣梵義普結善緣導引羣生同參勝果其有能通上乘繼闡正宗使諸部愚蒙悉資開悟者宜加多楮獎元沛寵封茲以爾慧性深沈經文諳習

既著靈蹤於齡歲益堅戒律以壯年承襲以來皈依者衆朕甚嘉之故特依前  
輩達賴喇嘛例封爾爲大善自在佛所領天下釋教普通瓦赤拉坦喇嘛達賴  
喇嘛改受金冊爾尙振修黃教主特烏斯本利濟以佑民迓庥祥而護國所有  
圖伯特事務其悉依例董率噶布倫等妥協商辦報明駐藏大臣轉奏俾圖伯  
特圖境延釐衆生蒙福彌勤啓迪用副綏懷茲隨冊齎往金銀綵幣玻璃器皿  
爾其敬承以光我國家億萬年無疆之休命欽哉二十六年十二月琦善以披  
楞卽英人請定界通商開詔耆英以守成約拒之二十七年七月耆英復以英  
德使請於西藏指明舊界派員前往閱諭駐藏大臣斌良密查如無流弊自應  
照舊奏准允行倘心懷詭譎卽當據理駁飭並諭海善派員往查事尋中輟二  
十八年賞公爵策旺頓柱寶石頂雙眼花翎咸豐二年達賴親往布賚綳色拉  
喇勒丹及南海壇科各寺院熬茶講經詔幫辦大臣額勒亨額安爾照料尋病  
歿由駐藏大臣穆騰額奏駐藏守備童星魁前往護送三年達賴以髮逆滋擾  
各省虔誠念經禱賊匪速滅奉旨嘉獎四年十月理藩院議覆詣齡奏達賴年

己及歲應宜任事得旨達賴明年既己及歲一切事務交伊掌管所有賞給前輩之玉冊玉印凡遇吉祥之事准其鈐用如常事仍用金印以示廣興黃教至意五年正月遵旨掌管政教事務十二月在布達拉圓寂年十八十一輩阿旺羅布羅丹貝甲木參稱嘉穆錯於咸豐六年在沃卡壩卓轉世八年正月奏明在金奔巴瓶內掣定九年七月迎至布達拉坐牀賞達賴之父彭錯策旺公爵先是三年四月廓爾喀商人與察木多番商索債起衅聚衆械鬥互有殺傷經駐藏大臣穆騰額照夷例分別罰款完案嗣因多收稅米阻撓商民藉端與藏邊失和唐古特屢戰不勝宗喀濟噶拉木等處均陷於賊駐藏大臣赫特賀馳往後藏督辦防勦事宜命成將都軍樂斌統漢土官兵繼進廓番聞大兵將至懼遣其噶箕來藏上表乞和詔許罷兵唐古特與廓爾喀議定約十條唐古特每年給廓爾喀稅課銀二千兩廓爾喀將所占地方交還唐古時商上管理同治元年掌辦商上事務時徵呼圖克圖因減放佈施連同色拉寺與布資棚噶勒丹兩寺聞不勝藏中僧俗公斥之携印潛逃赴京詔黜其名號不准轉世

命諾們汗汪曲結布協理商上事務汪由結布者原係俗裝曾爲噶布倫卽俗所謂沙扎噶隆是也因與噶微忤辭官削髮爲僧至是復起用乃創修拉薩城垣自西而東工未竣而歿遂罷役初駐藏官兵自遊擊以下均聚居扎什敦布營房時駐藏大臣滿慶以藏中屢不靖命遷拉薩市從此儼屋而居扎什城之營房遂廢三年噶勒丹池巴羅布藏青饒汪曲爲達賴傳授小戒膽對逆番久圍裏塘梗塞驛路其酋工布朗結復令期美工布大股逆賊至巴塘裏塘交界之三壩地方劫去糧員行李搶奪山藏發出摺報公文其格吉地方亦有告急夷信工布朗結曾於道光末滋前任川督琦善帶兵往勦並未蕩平以膽封歸各土司侵地奏予工布朗結職罷兵至是益無畏懼將附近土司任意蠶食川藏商賈不通兵餉轉運難艱漢番均困駐藏大臣滿慶派番員徵兵借餉並約三十九族調集各處土兵防勦膽對西北川督駱秉章派員督飭打箭鎗及巴裏文武同明正土司及大小金川等土司兵進攻其東南而藏中所派之兵甫至巴塘董旋即搶掠詔令撤回至四年事平奉旨將上中下三膽地方賞給達

賴管理建廟焚修賞達賴之兄伊喜羅布汪曲承襲公爵七年親至前藏攢招八年捐修扎林噶舒金塔十年親往布資棚色拉二寺熬茶講經十二年親至前藏攢招是年二月遵旨接營政教事務十三年及光緒元年均親至前藏攢招是年三月在布達拉圓寂年二十二世阿旺羅布藏塔布克嘉穆錯於光緒二年五月在達布甲擦營官屬下朗賴家轉世至是呼畢勒罕訪獲班禪率同有職各僧俗人等出具圖記公稟懇請駐藏大臣淮松代奏奉旨毋庸入瓶簽掣卽定爲達賴之呼畢勒罕四年正月在貢湯德娃夫由班禪披髮授戒取定法名六月迎至布達拉坐牀銷去呼畢勒罕名號賞達賴之父工噶仁青公爵寶石頂孔雀翎八年正月由正師傅濟隴呼圖克圖傳經授戒十年因攢招各處喇嘛屬集與巴勒布商人購物起釁將巴商八十三家全行劫毀廓爾喀因索償損失銀三十餘萬兩並集兵挾制駐藏大臣色楞額奏派漢番委員前往開導曉以恩威始允減爲十八萬有奇除唐古特商上捐壽及清出貨物抵價外尙不敷銀六萬七千餘兩奉旨由四川撥給十一年親至前藏攢招十四



年工噶仁青故賞達賴之兄頓柱尊吉公爵是年親往布賚綢色拉寺熬茶講經十五年親至前藏熬招當達賴降生之年哲孟雄與布魯克部長因英併印度與哲布接壤漸有窺藏心籲請籌備而廷旨不甚注重謂披楞頭人現向布魯克部長租地修路意欲來藏通商惟布魯克巴與哲孟雄毗連哲孟雄既已認租修路難保不暗中勾結引進詔松淮相機開導務令各守疆界勸諭阻回哲人知中朝不知邊情反疑其勾結滋事於是漸昵英人以捻納爲英租界英竟視爲保護地藏人漸覺英之逼已訟言哲人私結英約屢議伐之哲乃益親英矣光緒十三年藏人於隆吐設卡遂與印度兵戰敗焉朝旨屢諭駐藏大臣文碩令藏人撤卡文碩奏實藏地卡無可撤嚴旨責焉以升泰代之總署與英使議邊界通商戒印兵毋進藏藏番据新圖以隆吐日納宗爲藏地堅勿讓文碩據以入告而中旨謂向來西藏圖說藏地與哲布分界處東西一線相齊藏境中並無隆吐日納宗之名今文碩寄來新圖隆吐日納宗在藏南突出一塊插入哲布兩界之內而布藏分界之處恰在捻納修路東西一線之北新圖

以黃色爲藏界而日納營官寨之地註明數十年前喇嘛給與哲孟雄現仍畫黃色正與隆吐山相近難保非藏人多畫此一段飾稱現界也並著升泰詳細確查究竟隆吐屬哲屬藏據實覆奏毋得稍有捏飾時樞廷以都察院劾文碩革之而升泰初到任時猶知藏人理直奏稱隆吐山南北本皆哲孟雄地方英人雖視爲保護境內其實哲孟雄布魯克巴皆西藏藩屬每屆年終兩部長必與駐藏大臣呈遞賀稟駐藏大臣厚加厚賚以撫綏之在唐古忒則自達賴喇嘛以次均有額定禮物商上亦回賞綬正銀茶與兩部回信底稿均呈送駐藏大臣查核批准照繕始行回覆哲布兩部遇有爭訟亦稟由藏酌派漢番辦理此哲布爲藏地屬藩實在實情形也執政置弗理藏人知文碩被議不直中朝所爲遂自動思復仇諭升泰嚴止之僉憤藏人誓衆曰凡我藏衆男女誓不與英人共天地有渝此誓衆共殛之乃大集兵於帕克哩將痛擊印軍升泰搜得乾隆五十三年舊哲孟雄受逼於廓爾喀達賴乃以日納宗給哲人今哲私通英人地應收回升泰屢諭不從印兵攻熱勒巴拉山藏兵傷亡數百印兵追入

徵畢各印度政府令勿窮追諷駐藏大臣赴邊界與印官會晤英外部告駐英使劉瑞芬商議和平了結藏人謂英若據有哲地則誓不共立十四年八月印兵大隊收哲孟雄全部攻藏兵於捻都納藏兵敗退咱利亞東朗熱諸隘並失藏萬餘盡潰印兵追噶布倫等於仁進岡與駐藏大臣所遣止戰之武員蕭占先遇占先豎漢字阻印兵印兵止槍約相見占先約勿窮追印兵官欲擊仁進岡民居占先告以此爲中國土藏番違旨用兵中國當嚴爲處置請勿燒兵兵官諾之要約速辦乃退兵藏兵旣大敗失地仍志在復仇升泰屢嚴止之不聽藏人目漢官爲洋黨屢欲暴動終南所憚而止印官以天寒不能再緩升泰卽至邊界議約而藏衆以噶布倫中一二人主和有壞黃教羣議投之藏江力要駐藏大臣代索回哲孟雄布魯克巴全境否則傾衆一戰藏兵復集大隊備四路升泰撲藏力阻之仍百計諷藏僧戒藏番毋妄動乃馳赴邊界議約時近寒人馬多凍斃抵咱克哩隘外藏兵尙有萬人駐仁進岡升泰命撤退藏官言大臣尙未與印官晤未敢遽撤乃退紮數十里哲孟雄部長命其弟來謁言來見

爲印兵所阻升泰與英官保爾會於納蕩英官言哲孟雄與印度互立約已二十七年應歸印度保護藏與印構兵藏既屢敗我兵何難長驅捲藏全土以邦交故按兵靜候並索藏賠兵費升泰嘗哲爲藏屬從前印哲立約並未見印督照會藏番亦未赴印境滋擾藏費無名英人又在布魯克巴及後藏于瀾修路藏人又大震英官要求甚奢升泰力折之藏人漸就範升泰屢要英撤兵英不可而藏衆已成軍之三大寺僧兵及駐仁進岡之兵萬餘皆撤退噶布倫及額神僧官十餘其他番官數十員隨升泰至邊皆駐仁進岡不敢與英官晤升泰以哲事未能卽竣大雪封山運糧無所亦退駐仁進岡總署派英人赫政赴藏充通譯哲孟雄部長之母率所屬親族連名上稟言英官當年立約不得過日喜曲河哲孟雄租地與英歲應納一萬二千圓英人倚其國勢歲久不給印藏構釁復致殃及伊母子親族實不願歸英乞勿將哲境劃出版圖之外英人既掠哲地全境復押哲部長安置噶倫細以重兵駐哲境招印度及廓爾喀遊民闢地墾荒廷議以哲事無從挽救慮梗藏議諭升泰勿布布魯克巴地數倍哲

孟雄西人呼爲布丹國光緒間尙入貢升泰至邊部長遣兵千七百人護衛升泰慮爲英口實謝去並乞印綬封號升泰允代請諸朝藏哲舊界本在雅納支木兩山其後商人往來之咱利爲新關捷徑西人稱熱勒巴勒嶺升泰議於咱利山先分藏哲界以符前案其印哲之界在日喜曲河擬於約中注明印哲立約在咸豐十一年無案可稽實勿論哲部長土朵朗思印度稱爲西金玉旣被幽於噶倫綑其母及子尙居春丕卽英人所稱徵畢也印營假部長書取其兩子赴噶倫綑部長母堅不可挈其兩孫至升泰營哭訴丐中朝作主升泰無以援之也英人又欲易置其部長升泰婉止之赫政阻雪久不達十五年二月藏兵盡撤歸升泰請總署告英電印兵速撤三月赫政至邊藏兵盡撤藏人言藏哲本有舊界日納宗旣賜哲孟雄其隆吐山之格歷傾倉地實有藏人遊牧場確爲藏哲舊界至咱里山本無鄂博不過上年實於此限止印人耳通商極非所願然不敢違朝命惟咱利以內洋人萬不可來赫政赴營與議英人謂咱利之界萬不可移至哲孟雄與商上及駐藏大臣舊有禮節均可仍之惟西金界

內藏番不得有此權允此方可開議升泰諾爲印兵旣撤退英人尙久不訂約升泰奏云聞藏人言與有仇之英議和孰若與無仇之俄通好俄人前次來藏我等備禮勸阻俄卽退去今英謀吾地偶爾戰勝遂恣欺凌實所不甘查去年俄人有出和崗至藏之請如英再延宕則藏更生心本年蒙古人由草地禮佛絡繹不絕隨來者頗類俄人設藏番私與通款則稽查不易邊事久不定局俄或私行勾結藏番英俄互相猜忌則後患方長乞告使電催印督速定藏約十月升泰奏英人擬撤兵之後悉照向章不必辦理通商不必另立新約通商一事本英官初次會議卽行提出又屢言西人欲至藏貿易答以番情疑詐萬難辦理然後許至江孜力言再四又許退至帕喀仍復力拒英官意拂然彼時首重通商否則萬難了結臣力諭藏番通商萬不可免始據藏番出具遵結今英人忽不言通商亦自有故當日英人深知藏番於此事力拒數年意謂藏番必不遵行故借以爲難今知出結遵辦恐定約以後他國援以爲請則藏地不能入其範圍是以忽議中止然英人不議通商藏人實所深願但能不自啓釁端

未嘗不可暫保無事俄人亦不能有所干求目前亦可免生枝節惟日後防範宜嚴未可再涉疏懈現藏印均已退兵前怨已釋自應彼此立約以昭信守彼族恐一經定約卽不能狡焉思逞故任意延緩惟自入夏至今曠日持久虛糜時日萬難再延請速商英使迅電印督速行議結哲孟雄部長言願棄地居春不升泰止之十六年二月以升泰爲全權大臣與印督定約八款自布坦交界之支英摯山起至廓爾喀邊界止分藏哲界線承認哲孟雄歸英保護藏印通商交涉游牧三款俟議簽約於印度孟加拉城鈐印後由大臣薛福成在倫敦互換五月給布魯克巴部長印十七年三月升泰奏移設納金要隘八月二泰奏奏改關游歷等部藏番不避開導請仍在亞東立市下所司知之十九年十月派四川越嵩營參將何長榮稅務司赫政與英國政務司保爾在大吉嶺議定藏印通商交涉游牧條約九款開亞東爲商埠聽英商貿易添設靖西廳同知監督之印政府派員駐紮察看商務自交界至亞東任英商隨意來往藏界內英人與中藏人民訴訟由中國邊界官與英員商辦印度遞駐藏大臣文件

由印度駐哲孟雄之員交中國邊務委員驛遞藏人至哲孟雄游牧遵英國定章與原約一律奉行此約既訂藏人以通商事英人獨享權利而游牧事藏人反受限制於亞東開埠之事不肯實行二十一年正月榮增正師傅普爾覺沙布囑爲達賴傳授格隆大戒是年掌辦商上事務前榮增師傅第穆呼圖克圖因病辭退十一月遵旨接管政教事務二十四年瞻對與川屬明正土司構辭四川總督鹿傳霖奏明派兵攻取瞻對成都將軍恭壽駐藏大臣文海先後奏陳而達賴亦密遣喇嘛羅桑稱勒等赴京呈訴於是朝廷俯順番情命將三瞻地方仍實還達賴毋庸改歸四川管理是年親赴色拉布資綏噶勒丹三大寺熬茶講經二十五年親往歸前撥招二十六年殺其前掌辦商上事務榮增正師傅第穆呼圖克圖阿旺羅布藏稱勒饒結及其弟洛策等第穆所居之聞宗寺財產全行查抄入己並咨請駐藏大臣裕綱代奏將第穆呼圖克圖名號永遠革除是年親赴南海瓊科爾結等處熬茶講經二十九年藏英以爭界故英兵進藏初達賴誤以俄羅斯爲同教親俄而遠英雖兩次與英議定條約迄未



實行俄員某僞作蒙古喇嘛裝束秘密入藏爲達賴畫策購置火器意圖抗英英雖偵知之而無如何也至俄方東困於日本不暇遠略英遂藉事稱兵詔裕綱往解之達賴恃俄員爲謀主不欲和思與英人一戰乃止裕綱行弗使番民支烏拉夫馬並調集各路番兵西藏番兵以乍了爲強然無紀律甫抵拉薩卽圍攻駐藏大臣衙署死者數十人後經藏官彈壓開往前敵未交綏均潰變由小路逃去時藏兵屢敗英兵日迫詔解裕綱任尋革職駐藏大臣有泰至藏英軍猶駐堆部約赴帕克里議和照十六年條約辦理願卽休兵有泰初與達賴商願自往阻英兵達賴尼之然亦無他策惟日令箭頭寺護法誦經詛咒英兵速死而已既而有泰藉口商上不肯支應烏拉不能啓程僅以李福林往怯不遇英軍至江孜盼有泰赴議有泰仍不敢行藏人怨之未幾英人長驅直入達賴聞知大懼先一日以印授噶爾丹寺噶布倫倉皇北遁至青海有泰以達賴平日跋扈妄爲臨時潛逃無蹤請褫革達賴喇嘛名號榮赫鵬旣得志因列條約十款迫噶爾丹寺噶布倫羅生夏爾等簽約於拉薩一西藏允遵守光緒十

六年中英條約並允認該第一款哲藏邊界二江孜噶大克亞東三處開爲商埠三四從略五自印邊該江孜噶大克各通道不得阻礙六七從略八印邊至江孜拉薩之礮臺山寨一律削平九以下五端非得英國允許不能舉辦（一）西藏土地不准租讓與他國（二）他國不准干涉西藏一切事宜（三）他國不得派員入藏（四）路礦電線及別項利權不許他國享受（五）西藏進款貨物錢幣等不許給與各外國抵押撥兌有泰往見榮赫鵬自言無權受制商上不肯支應夫馬榮赫鵬笑頷之英人卽據爲中國在藏無主權之證其先有泰電外務部言番衆再大敗卽有轉機英軍進拉薩圖壓服藏衆及英軍至與藏定約誘有泰畫押朝旨切責之春不暫住英兵俟應償兵費二百五十萬盧比繳清英行撤退朝廷以藏約損失之權太甚命津海關道唐紹儀以三品卿加副都統銜赴藏全權議約時議以藏事危急宜經營四川土司及時將三瞻收回諭川督錫良等籌辦錫良擬改土歸流泰寧寺喇嘛以兵抗朝命駐藏幫辦大臣鳳全馳往勦辦至巴塘爲番衆所戕錫良奏派四川建昌道趙爾豐會同

四川提督馬維騏往三十一年六月馬維騏克復巴塘趙爾豐繼至接辦善後事宜並搜捕餘匪全境肅清十一月以裏塘屬之鄉城桑披嶺寺嘗戕官弁稔惡不法派兵往討翌年閏五月克之擒其渠魁並克同惡之稻壩貢噶嶺詔以趙爾豐爲邊務大臣八月至裏塘將裏塘土司改流以防軍五營分駐裏巴改流之地十二月鹽井之河西臘翁寺爲亂討平之十三年正月草創學務農墾水利橋梁採鑛醫藥諸要政粗具規模設裏化定鄉巴安等縣並將應行興革諸大端次第陳奏得部撥開辦經費一百萬兩三十四年七月會同川督趙爾巽奏設康安道改打箭鎗爲康定府設河口縣裏化廳同知稻成縣貢噶縣丞巴安府三霸廳通判定鄉縣鹽井孫并招募西軍三營是秋因德格土司兄弟爭繼奏明往辦十二月至德格匪黨退保雜渠卡趙軍進攻至翌年六月降之德格肅清土司請納土改流乃招集百姓議定賦稅九月春科高日兩土司及靈葱土司之郎吉嶺均改流又渡金沙口巡閱春科地方十月三十九族波密內附八宿請改官均撫循之並派兵駐勦類伍齊碩搬多洛隆宗邊壩阻路

之番人遂分兵取江卡貢覺桑昂雜獫威收服之宣統二年正月邊軍越丹達山以西直抵江達是時川軍正擬入藏特爲聲援並奏請與藏人於江達畫界設邊北道登科府德化州白玉州同普縣石渠縣遂巡閱乍丫煙袋塘阿足設乍丫委員定鄉兵變派鳳山討平之三巖野番索戰派傳嵩秋討平之設三巖委員二月以巴塘屬之得榮浪藏梗命派兵攻克之設得榮委員并收服浪藏寺北之冷石卡嗣逆爾豐督川以傳嵩秋代理邊務大臣五月趙爾豐傳嵩秋以兵至孔撒麻書收其地設甘孜委員並檄靈葱白利倬倭單東魚科明正各土司繳印改土歸流色達及上羅科野番來投六月至瞻對逐藏官收其地設瞻對委員旋返打箭鏹檄魚通卓斯各土司繳印改流又收復咱里冷邊沈邊三土司魚科土司抗不繳印擊破之魚科降於是傳嵩秋以邊地各土司先後改流已成行省規模乃建議以爲川邊故康地其他在西設行省曰西康建方鎮以爲川滇屏蔽設爲以邊務大臣爲西康巡撫改邊務支局爲度支司關外學務局爲提學司康安道爲提法司邊北道爲民政司自打箭鏹以西至丹達

山三千餘里南抵維西中甸北至甘肅西甯四千餘里均爲西康轄境旣入奏於是年七月崇喜納奪土司先後繳印八月又傳檄察木多乍了兩呼圖克圖改流設理事官於是西康全局遂以底定嗣值鼎革川局又變建省之議卒不果行當唐紹儀之議約也於光緒三十一年正月至印度與英議約專使寶利夏會議多次英使諱言廢約允商訂修改紹儀易其七八費謂無異廢約堅拒焉費雖名全權而約事多主於印度總督寇仁紹儀面揭之費乃允商第九款又力辦主國上國之據較展不讓乃借遼瀋議約事奉命回京留參贊張蔭棠在印接議英仍堅持初議卒無結果會易內閣更易宗旨稍變駐京英使薩道義接英政府訓將條約稿稍有更易命在京外務部商訂政府以西藏與英屬印度接壤歷年邊界交涉爭端屢起中國兩次與英訂約無非以睦鄰之計爲固圉之謀英新政府旣有意轉圜仍飭該使臣在京續商在我自當早圖結束以保主權因由唐紹儀與英使薩道義訂定藏印續款六款（一）光緒三十七年七月英藏所立約暨英文漢文約本附入現立之約作爲附約彼此允認切

實遵守並將更訂批准之文據亦附入此約如遇有應行設法彼此隨時設法將該約內各節切實辦理(一)英國國家允不佔併藏境及不干涉西藏一切政治中國國家亦應允不認他外國干涉藏境及一切內治(二)光緒三十年七月英藏所立之約第九款內之第四節所聲明各項權利除中國獨能享受外不許他國國家及他國人民享受惟經與中國商定在該約第二款指明之各商埠英國應得設電綫通報印度境內之利益(四)所有光緒十六十九年中國與英國所定兩次藏印條約其所載各款如與本約及附約無違背者概應切實施行(五)(六)從略以挽救前約之失藏應償兵費一百二十餘萬兩朝廷允代籌還英人始無亂於北京籤押旋有泰被言官彈劾詔五品京堂張蔭棠前往查辦有泰及其隨員均獲罪褫革謫戍有差蔭棠入藏三十二年專辦開埠事事時英軍尙駐春不照約俟三埠開妥賠款清交始撤兵故開埠尤亟亟也三十四年政府以光緒三十二年附約第三款內載中英條約所有更改之處另行酌辦等語特派張蔭棠爲全權大臣與英專使章禮敦議訂藏印

通商章程十五款其要者（一）劃定江孜商埠界綫（四）英印人民與中藏人爭論由英商務委員與中藏官員會同查訊而議辦法（六）英軍撤退後印邊至江孜一路旅舍由中國贖回所有電綫俟中國電綫接修至江孜後亦酌量售與中國（八）已開及將開各埠英商務委員因往來印邊界文件得用傳遞夫役又英國官商雇用中藏人民作合法事業不得稍加限制（九）凡往來各商埠之英官民貨物應確循印藏邊界之商路不得擅經他處（十）英國人民可在便以貨物或銀錢交易任便將貨物出售或購買土產不得限制抑勒此約除中英簽押外並有西藏噶布倫汪曲結布隨同畫押實開三方并列先例藏局又爲一變厥後英藏交涉日繁而政府撫馭藏番既有英藏拉薩之約在先其事益臻艱困至宣統季年遂有經略川邊及達賴二次出亡之事自光緒三十年達賴與英人啓衅戰敗出奔後卓錫於庫倫意在投俄而與哲布尊丹巴呼圖克圖不睦經庫倫辦事大臣德麟電奏乞援詔西甯辦事大臣延祉俟過冬後迎護至西甯而達賴又欲在代臣王旗小住廷旨以王旗部落甚小達

賴隨帶人衆恐難供億翌年僑居塔爾寺又與阿嘉呼圖克圖同居一處積不相能陝甘總督升允奏達賴性情貪嗇久駐思歸應否准其回藏得旨俟藏務大定再行回藏而調阿嘉來京以和解之旋由西甯往五台山折而至京覲見於仁壽殿如順治朝優禮有加三十四年十月以萬壽節率徒祝嘏特加封號以昭優異懿旨曰達賴喇嘛業經循照舊制封爲西天大善自在佛茲特加封爲誠順贊化西天大善自在佛並按年賞給糜餼銀一萬兩由四川藩庫分季支發達賴喇嘛受封後卽令仍回西藏經過地方派員妥爲照料到藏以後當確遵主國之典章揚中朝之信義並化導番衆謹守法度習爲善良所有事務依例報明駐藏大臣隨時轉奏恭候定奪期使疆宇永保安僧俗悉除畛域以無負朝廷護持黃教綏靖邊陲至意旋以國有大喪受封未便舉行達賴以不服水土請詔令先行起程至塔爾寺受封又值停止筵宴之時未便設餞仍派大臣護送如來時禮節至西甯卽請將阿嘉斥革並以此事爲回藏之要挾達賴聘練兵教習十餘人影射蒙古實係俄人多購軍火回藏初張蔭棠以西



藏以地當衝要英俄環伺非早籌整頓難以圖存建議以漢員指揮另派北洋新軍入藏分駐要塞以厚聲援駐藏大臣聯豫疏陳藏中情形亦有派遣軍隊之請會川邊藏番擾亂進攻三崖三崖者本巴塘屬地與德格多納兩土司接壤向歸川省管轄乃藏番察台三大寺無端派番官帶兵佔據上崖調渣鴉江卡各土司助兵逼勒崖夷投降并徧肆煽惑打箭鎗一帶均爲震動同時瞻對番官勾結德格土司之弟爲亂逐其兄鎰城文武據報派麻書土千總江文荃查辦均被圍困經川督入奏廷議以三崖德格均係多境番官竟敢糾衆侵逼再事優容恐番焰日張土司解體命川督會同趙爾豐相機籌辦爾豐電奏力主用兵並稱此次藏番與達賴有關係請飭達賴傳諭退兵乃飭達壽張蔭棠詰問達賴答詞閃爍意涉支吾政府以達賴縱肯戒飭番衆而萬里遺書需時甚久三崖等處被攻正急何能久待遂電爾豐進剿三十四年冬番兵調集益衆近逼鹽井言聲言索戰雖經川軍擊敗番衆仍未退卻揚言阻止趙爾豐入藏政府以藏番舉動顯係有恃不恐藏地介在強鄰之間意存首鼠自非設法

經營無以保我邊圉因思光緒三十三四年間聯豫等條陳有善後辦法二十四條創財政督練路鑛鹽茶學務巡警農務工商交涉九局擬卽採擇試辦但無兵不敷彈壓多名又恐難相安擬先設兵三千其一千由川督就川兵挑選精銳厚給餉械派得力統領率之入藏歸駐藏大臣節制調遣餘二千由駐藏大臣就近選募另調川中哨弁官長俾任訓練統率之事以期持久聯豫趙爾巽覆奏贊其議遂派知府鍾穎統領川兵於宣統元年六月啓程入藏取道德格繞過江卡至察木多藏番在恩達類烏齊一帶擬聚兵堵截十一月川軍抵類烏齊藏番不戰自退川軍遂由三十九族間道前進十二月抵拉里江達番兵聞川軍且至焚其積聚刼殺漢兵扼守川軍進擊大破之達賴自光緒三十四年山西寧入覲出京回藏沿途逗留又繞道德格等處遷延不進其冬始回拉薩二年正月達賴聞川軍將至乘夜西奔潛赴印度川軍遂轉戰入藏朝廷得聯豫奏報降旨數達賴罪惡革去名號一面責成聯豫趙爾巽會籌防務安輯軍民一面降旨另訪呼畢勒罕以噶勒丹池巴羅布藏丹巴代理商上事宜

其噶布倫以下各藏官供職如故藏中僧俗亦安堵無事是年三月聯豫請于曲水哈拉烏蘇江達碩般多及三十九族各設委員一三年二月聯豫奏裁駐藏幫辦大臣改設左右參贊以羅長椅錢錫寶爲之會波密事起聯豫遣鍾穎攻之不克旋遣羅荷會趙爾豐軍平之其秋川軍變遂聯豫推鍾穎代之達賴始乘機重回拉薩以此次出奔深賴英人保護態度一變於是遂鍾穎而獨立中英之交涉益紛紜矣班禪第一輩凱珠巴格勒克爲宗喀巴二弟子出世至布五輩羅布藏伊什仍號班禪呼圖克圖康熙三十四年命御史鍾申保等賚敕召來京前藏第巴桑結以未出痘辭五十二年詔以班禪爲人安靜精通經典勤修貢職封爲班禪額爾德尼頒發金印金冊六輩羅布藏巴勒墊伊西乾隆四十三年請祝七旬萬壽許之迎護筵宴諸禮概從優異如順治九年達賴來觀例四十五年八月在熱河祝嘏至京居西黃寺是年頒賜玉印玉冊以痘圓寂命理藩院尙書博清額爲駐藏辦事大臣護送舍利金瓶回藏第七輩羅布藏巴勒墊丹貝宜瑪五十三年以廓爾喀擾邊命移泰寧輩平復歸後藏道

光十五年給金冊二十一年以接濟征森巴兵餉加宣化綏疆封號咸豐元年  
資七旬壽如六旬所賜次年圓寂年七十三第八輩羅布藏班墊格曲吉札克  
丹巴貝汪曲年二十九至第九輩羅布藏吐巴丹曲吉宜瑪格勒克拉木結光  
緒十八年正月迎至扎什倫布坐牀賞其外祖父期差汪布本身輔國公三十  
一年英人入藏詔班禪留後藏鎮攝十一月班禪隨英皇子游歷印度有泰勸  
阻不從十二月由印回藏諭以情詞恭順原擅行出境之咎勿治諄令恪供職  
守張蔭棠奏班禪受英唆使屢與達賴牴牾而全藏實權仍歸達賴替身掌握  
電告外務部請以恩澤籠絡班禪並羈縻達賴勿急旋藏旣而達賴將由西甯  
起程班禪請自迎之而實不行達賴抵拉薩班禪卽請覲諭訓聯豫等班禪來  
京於藏中情形是否相宜其後達賴獨立班禪亦不克安於藏矣統計達賴所  
轄寺廟三千五百五十餘所喇嘛三十萬二千五百有奇黑人十二萬一千四  
百三十八戶班禪所轄寺廟三百二十七喇嘛萬三千七百有奇黑人六千七  
百五十二戶西藏有爵五輔國公三一由貝子降襲一由鎮國公降襲一定世

襲一等台吉扎薩克一一等台吉一而達賴班禪之親以恩封者不與凡前後藏官均由駐藏大臣分別會同達賴班禪選補前藏唐古特官喀布倫四人三品爲總辦藏務之官其俗稱之曰四相議事之所曰噶廈其次什琿及商卓特巴各二人皆四品業爾倉巴二人則什轄二人協爾幫二人碩第巴二人皆五品達琿二人大中譯二人卓尼爾三人皆六品什琿商特巴爲商上辦事之官凡喇嘛謂庫藏出納之所曰商上業爾倉巴爲管糧之官朗什轄爲管街道之官協爾幫爲管刑名之官碩第巴爲管理布達拉一帶齊民之官達琿爲管馬廠之官大中譯卓尼爾等爲噶廈辦事之官管兵者曰戴琿六人四品如琿十二人五品甲琿二十四人六品定琿一百二十人七品多東科爾族任之其治理地方者曰營官前藏大營十人乃東曰瓊結曰貢噶爾曰崑崙曰桑昂曲宗曰工布則岡曰江孜曰昔孜曰協噶爾曰納倉營官皆五品後藏大營三曰拉孜曰練營曰金龍營官皆三品前藏中營四十二日洛隆宗曰角木宗曰打孜曰桑葉曰巴浪曰仁本日仁孜曰朗嶺曰宗喀曰撒噶曰作岡曰達爾宗曰江

達曰古浪曰沃卡曰冷竹宗曰曲水曰突宗曰僧宗曰維仁曰茹挖曰鎖莊子  
曰奪曰結登曰眞谷曰碩般多曰拉里曰朗曰沃隆曰墨竹宮曰卡爾孜曰丈  
扎卡曰轄魯曰策堆得曰達爾瑪曰斯母曰拉噶孜曰嶺曰納布曰諾噶爾曰  
錯朗曰羊八井曰麻爾江後藏中營十四曰昂忍曰仁侵孜曰結侵孜曰帕克  
仲曰翁貢曰干殿熱布結曰扎布甲曰里卜曰德慶熱布結曰央曰絨錯曰葱  
堆曰魯曰干壩營官皆六品前官小營二十五曰雅爾堆曰金東曰拉歲曰撒  
拉曰浪蕩曰頗章曰札溪曰色曰堆冲曰汪熱曰田錯曰拉康曰瓊科爾結曰  
蔡里曰曲隆曰扎稱曰扎布嶺曰扎什曰洛美曰嘉爾布曰朗茹曰里烏曰降  
曰業黨曰工布塘曰達後藏小營十五曰彭錯嶺曰倫珠子曰拉耳塘曰達爾  
結曰甲冲曰哲宗曰擦耳曰晤欲曰碌洞曰科朗曰哲喜孜曰波多曰達木牛  
廠曰練噶爾曰札茹營官皆七品而前藏邊營十四曰江卡曰堆噶爾本日噶  
喇烏蘇曰錯拉曰帕克里曰定結曰茹拉木曰濟隴曰官覺曰補仁曰博窩曰  
工布碩卡曰絨轄爾曰達巴喀營官皆五品每營營官一人或二人以喇嘛黑

人參任之喇嘛之有游牧者東起乍了達呼圖克圖與四川打箭鎗所屬土司接其西爲察木多吧克巴拉呼圖克圖又西爲碩般多喇嘛又西爲類烏齊呼圖克圖碩般多類烏齊之北皆與西藏大臣所屬土司接碩般多之南爲八所喇嘛又南爲工布什卡喇嘛類烏齊之西爲墨竹宮喇嘛又西爲噶勒丹喇嘛類烏齊之西北爲贊墊喇嘛介居西藏大臣所屬各土司之間其西爲埒徵喇嘛噶勒丹之西爲色拉喇嘛西與布達拉接噶勒丹之南爲瓊科爾結喇嘛其西爲丈扎卡喇嘛又西爲松熱嶺喇嘛又西爲那仁曲第喇嘛又西南爲乃東喇嘛北與布達拉接乃東之西爲瓊結喇嘛布達拉之西北爲布勒綳喇嘛又西北爲羊八井喇嘛其西爲朗嶺喇嘛西與扎什倫布接朗嶺之南爲仁本喇嘛其西南爲江孜喇嘛又西南爲岡堅喇嘛岡堅之西爲協噶爾喇嘛協噶爾之西爲姑拉木喇嘛朗嶺之西爲撒噶喇嘛又西爲雜仁喇嘛其直屬於駐藏大臣者有達木額魯特八旗在喜湯者四旗在湯甯者二旗在佛山者一旗皆北倚布幹山南與前藏接在格拉者一旗東北濱喀喇烏蘇西與後藏接每旗

置佐領一有三十九族土司曰瓊布噶魯曰瓊布巴爾查曰瓊布納克魯曰勒  
納夥爾曰色里瓊扎尼查爾曰色里瓊扎參嘛布瑪曰色里瓊扎嘛噶曰本朱  
特羊巴曰布米特勒達克曰木朱特尼牙木查曰木朱特利松嘛吧曰木朱特  
多嘛巴曰勒遠夥爾曰依戎夥爾移他瑪曰查楚和爾係提瑪爾曰巴爾達山  
木多川目桑曰嘛拉布什嘛弄曰窩柱特只多曰窩柱特娃拉曰彭楚克夥爾  
曰彭楚克彭他瑪爾曰彭楚克拉寨曰盆索納克書達格魯克曰沁體牙岡納  
克書畢魯曰盆沙尼牙岡納克書色爾查曰巴爾達穆納克喜奔盆曰納格沙  
拉克書拉克什曰洛克納克書貢巴曰三渣曰曰三納拉巴曰撲旅曰上阿扎  
克曰下阿扎克曰白臘扎嘛爾曰上岡噶魯曰下岡噶魯曰上奪爾樹曰下奪  
爾樹皆土納馬賦總之以夷情章京山之大者曰岡底斯山卽崑侖爲東半球  
衆山衆水之祖曰僧格山曰耶千山曰瑪加布山曰達木楚克山曰朗布山曰  
巴薩通拉木山曰諾莫渾烏巴什山是三山卽三危川之大者曰鄂穆河下游  
爲瀾滄江曰喀喇烏蘇河卽黑水下游爲潞江曰薄藏布河曰雅魯藏布江亦



曰大金沙江曰朋楚河曰岡噶江澤之大者曰瑪帕本達賴池曰郎噶池曰牙  
母魯克池曰騰格里池曰牙爾佳池其物產自靖西東之堆朗至薩馬達一帶  
皆有五金煤鐵其金鐵最著者曰爾倉曰噶大克出鹽最著者曰勒牙曰雅幹  
几十三其疆界西接印度之拉克達部西南接洛敏湯作木朗廓爾喀諸部南  
接哲孟雄布魯克巴各部及貉揄茹巴之怒江東接四川巴塘之南墩寧靜山  
東南接雲南維西東北接西甯所管之邦木稱巴彥諸土司北至木魯烏蘇接  
西甯所屬玉樹諸土司西北至噶爾藏骨岔阿爾坦諾爾一帶接新疆和闐莎  
車

清史稿

列傳

屬國

有清龍興長白撫有蒙古列爲藩封當時用兵中原而朝鮮服屬有明近在肘腋屢抗王師崇德二年再入其都國王面縛納質永爲臣僕自此東顧無憂專力中夏順治沼明威震殊方三年琉球聞聲首先請封九年暹羅十七年安南相繼歸附雍正四年蘇祿七年南掌先後入貢蓋其時武義璜璜陸懾水慄殊國絕域交臂訕膝慕義歸化非以力征也高宗繼統國益富饒帝喜遠略蕩平回疆兵不血刃而浩罕布魯特哈薩克安集延瑪爾噶朗那木干塔什干巴達克山博羅爾阿富汗坎巨提相率款塞通譯四萬舉踵來王乾隆中葉再征緬甸三十四年緬懇乞貢五十七年復征服廓爾喀稽首稱藩於是環列中土諸邦悉爲屬國版圖式廓邊備積完芒聖德蓋秦漢以來未之有也咸同之際內亂頻仍撻伐十餘年巨憝雖平而國力凋敝未遑圖遠日夷琉球英滅緬甸中國雖抗辭詰問莫拯其亡而越南朝鮮政紛亂作國家素守羈縻屬國之策

不干內政興衰治亂袖手膜視以至越南亡於法朝鮮併於日浩罕之屬蠶食  
於俄而屬國所墜存者坎巨提一隅而已越南朝鮮之役中國胥爲出兵而和  
戰無常國威掃地藩籬撤而堂室危外敵逼而內訌起藩屬之繫於國也如此  
傳曰天子守在四夷詎不信哉作屬國傳

清史稿

屬國傳一

朝鮮

琉球

朝鮮又稱韓國清初王朝鮮者李瑄事明甚謹太祖天命四年瑄遣其將姜宏立率師助明來侵軍富察之野戰而大敗姜宏立以兵五千降帝留宏立遣其部將張應京等十餘人還國遺瑄書曰昔爾國遭倭難明以兵救爾故爾國亦以兵助明勢不得已非與我有怨也今所禽將吏以王之故悉釋還國去就之機王其審所擇焉先是明萬曆中日本豐臣秀吉大舉侵朝鮮覆其八道明爲用兵七年會秀吉死兵罷朝鮮乃復國故書中及之朝鮮不報謝又出境拒征瓦爾喀之師烏拉貝勒布占泰侵朝鮮帝與布占泰有連諒止其兵朝鮮亦不謝及帝崩復不遣使弔問而明總兵毛文龍招遼民數萬守皮島與朝鮮犄角屢出師襲沿海城寨會朝鮮叛人韓潤鄭梅來歸請爲鄉導構兵端時太宗天

聰元年朝鮮國王李倣嗣位之三年也正月命貝勒阿敏等率師征朝鮮渡鴨綠江敗文龍兵于鐵山遁還皮島遂克義州定州及漢山城屠其軍民數萬焚糧百餘萬長驅而進渡靑泉江克安州進師平壤城中官民悉遁走乃渡大同江次中和倣惶遽甚遣使求成阿敏責數其罪二月師次黃州國中震恐求成之使絡繹於道遂逼王京倣勢蹙挈妻子遁江華島來告曰敝邑無所逃罪惟上國命是從乃許其和江華島在開州南海中遣使赴島諭倣而駐軍平山以待倣遣族弟原昌君李覺等獻馬百虎豹皮百綿綢苧布四百布萬有五千於是遣劉興祚巴克什庫爾禪往江華島泚盟三月庚午刑白馬烏牛誓告天地和議成約爲兄弟之國初朝鮮之求成也諸貝勒等議以明與蒙古兩敵環伺兵不可久在外且俘獲已多宜許其成而阿敏慕朝鮮國都城郭宮殿之壯不肯旋師貝勒濟爾哈朗及岳託碩託密議令阿敏軍平山而先與朝鮮盟事成始告阿敏阿敏謂己不預盟縱兵四掠乃復使李覺與阿敏盟於平壤城帝馳諭阿敏毋復秋毫擾分兵三千戍義州振旅而還以李覺歸九月從倣請召還

義州之兵并許贖俘虜定議春秋輸歲幣互市二年二月開市中江是年明經  
略袁崇煥殺毛文龍於皮島諸島兵無主五年謀乘虛征諸島徵兵船於朝鮮  
使至其國三日乃見倭覽書曰明國猶吾父也助人攻吾父之國可乎船殆不  
可藉也自是漸渝盟六年巴都禮察哈喇等使朝鮮頒定貢額還言倭於所定  
貢額止供什一金銀牛角非國所出不肯從七年正月賜倭書責其減歲幣額  
并竊殺畜匿逃人之罪欲罷遣使專互市二月遣備郎格等往會寧城互市倭  
拒之是夏文龍部將孔有德耿仲明等叛明以舟師二萬人渡海來降帝遣使  
徵糧朝鮮並索會寧城瓦爾喀逃人及布占泰之人倭屢書陳辯復加築京畿  
黃海平安三道白馬等十二城帝慰數倭負義州互市之約八年春帝欲价倭  
與明議和倭以書告皮島守將迄無成議冬倭使羅德憲來拒索逃人及互市  
詞甚厲且欲坐滿洲使臣於朝鮮大臣之下帝怒却其幣留德憲不遣仍以書  
諭倭九年平察哈爾林丹汗得元傳國璽八和碩貝勒及外藩蒙古四十九貝  
勒表請上尊號帝曰朝鮮兄弟之國宜與共議之於是內外諸貝勒各修書遣

使約朝鮮共推戴朝鮮諸臣爭言不可且以兵守使臣使臣英俄爾泰率衆奪馬突門係遣人迫付報書又以書諭其邊臣戒嚴有丁卯年誤與講和今當決絕之語英俄爾泰并奪之以獻十年四月改元崇德國號清朝朝鮮使李廓等來朝賀不拜賜書令送質子復不報十一月帝以朝鮮敗盟將統大軍親征先遣其使臣李廓等歸國遣書國王並馳檄朝鮮官民十二月辛未朔命鄭親王濟爾哈朗居守武英郡王阿濟格多羅饒餘貝勒阿巴泰分屯遼河海口備明海師援襲之路睿親王多爾袞貝勒豪格分統左翼滿洲蒙古兵從寬甸入長山口遣戶部承政馬福塔等率兵三百人潛往圍朝鮮王京豫親王率護軍千人繼之貝勒岳託等以兵三千濟師帝親率禮親王代善諸軍進發庚辰渡鎮江壬午次郭山城降定州安州丁酉次臨津江江在國都北百餘里與都南漢江夾拱王城者也時江冰未合車駕至冰驟堅六師畢濟馬福塔等以是月甲申潛襲王京敗其精兵數千掠倉皇遣使迎勞城外款兵而徙其妻子江華島自率親兵逾江保南漢山城大軍入都城多鐸岳託亦定平壤抵王京合軍渡江

圍南漢山城連敗其諸道援師帝至分兵搜剿都城而親率大軍渡江益軍圍南漢二年正月壬寅擊敗全羅道援兵遣使賁勅往諭朝鮮大臣甲辰大軍北渡漢江營王京東二十里江岸丁未擊敗全羅忠清兩道之師其多爾袞豪格左翼軍由長山口克昌州城敗安州黃州兵五百寧邊城兵千截殺援兵一萬五千至是來會師貝勒杜度送大轎至臨津江冰泮復合如前城圍益急癸丑倭請成不許己未再請成庚申降勅令山城親覲并縛獻倡議敗盟諸臣是日倭始奏書稱臣乞免出城帝命多爾袞以輪挽小船由陸出海礮沉其大艦三十小船徑渡入島城獲王妃王子宗室七十六人羣臣家口百六十有六客諸別室甲子諭倭速遵前詔出城來見倭乃獻出倡議敗盟之宏文館校理尹集修撰吳達濟及臺諫官洪翼漢詣軍前帝敕令去明年號納明所賜誥命冊印質二子奉大清國正朔萬壽節及中宮皇子千秋冬至元旦及諸慶弔事俱行貢獻禮遣大臣內官奉表與使臣相見及陪臣謁見併迎送饋使之禮母違明國舊例有征伐調兵扈從并獻犒師禮物母擅築城垣母擅收逃人每年進貢



一次其方物黃金百兩白金千兩水牛角二百對貂皮百張鹿皮百張茶千包水獺皮四百張青黍皮三百張胡椒十斗腰刀二十六口順刀二十口蘇木二百觔大紙千卷小紙千五百卷五爪龍蓆四領花蓆四十領白苧布二百疋綿綢二千疋細蘇布四百疋細布萬疋布四千疋米萬包倭以孤城窮蹙妻子被俘八道兵皆崩潰離散宗社垂絕乃頓首受命庚午從數十騎朝服山降二月築壇漢江東岸三田渡設黃幄帝陳儀衛渡江登壇作樂將士擐甲肅列倭率其羣臣離南漢山五里許步行令英俄爾岱馬福塔迎於一里外引至儀仗下立帝降坐率倭及其諸子拜天禮畢帝還坐倭率其屬伏地請罪宣詔赦之令坐壇下左側西向位諸王上賜燕畢還其君臣家屬盡召回諸道兵振旅而西詔以朝鮮新被兵先免丁丑戊寅兩年貢物以己卯年秋爲始如力有不逮臨時定奪朝鮮臣民樹碑頌德於三田渡壇下四月倭送質子湟湟至五月以朝鮮兵船助攻皮島功賜倭銀幣馬匹十月遣英俄爾泰馬福塔達雲等齎勅印制詔往封倭爲朝鮮國王十一月倭遣陪臣表賀萬壽冬至貢方物十二月賀

元旦爾凡萬壽聖節元旦冬至皆專遣陪臣表賀貢方物歲以爲常是年定貢道由鳳凰城其互市約凡鳳凰城諸處官員人等往義州市易者每年定限二次春季二月秋季八月寧古塔人往會寧市易者每年一次庫爾喀人往慶源市易者每二年一次由部差朝鮮通事官二人寧古塔官驍騎校筆帖式各一人前往監視定限二十日即回三年徵朝鮮兵從征明誤軍期降詔切責四年六月遣使往封倭繼室趙氏爲朝鮮王妃東方庫爾喀叛入東海中熊島命朝鮮討之倭遣將由慶興西水羅前浦進師七月執叛首加哈禪來獻賜倭銀二百兩五年十月諭倭以誕辰恩減歲貢內米九千包六年正月攻明錦州調朝鮮舟五千運糧萬石尋倭奏言軍船糧船三十二艘漂沒無存帝知其飾詞詔切責刻期督催復運糧萬石船百十有五艘由大小凌河口進至三山島途中遭風礁壞船五十餘又爲明水師截擊僅存五十二艘至蓋州不能前請從陸運詔以朝鮮三艘漂入明境通信及見明兵船不迎敵又不由水路進嚴斥之朝鮮臣林慶業大懼請冒險山水路帝仍許其改從陸止留精礮兵千斷卒五

百餘兵悉遣還既而運糧土馬久不至遣使詰責三月始有朝鮮總兵柳琳副將刁何良等率兵至錦州軍六月倭遣陪臣李浣等獻新羅瑞金奏言咸陽郡新溪書院新羅古寺遺基也居民袁年掘地得瓦鐫一蓋刻一千年三字中有黃金二十斤內一斤鐫宜春大吉四字優詔答之而原金付還七年錦州大捷明遣使議和帝勅詢倭令陳所見倭以止殺安民上符天意對已復偵有明兵船二至朝鮮界帝大怒並得其閣臣崔鳴吉兵使林慶業潛通明國書往來諸狀逮訊治罪八年九月朝鮮擒獲明天津偵探兵船一解至賜倭銀是月世祖卽位頒詔其國並賚敕往諭減歲貢內紅綠綿綢各五十疋白綿綢五百疋紵絲二百疋布二百疋腰刀六口龍蓆二領花蓆二十領十月倭遣其子湍奉表進香貢方物十二月倭遣陪臣奉表賀登極順治元年正月諭倭停解瓦爾喀人民五月以破流賊李自成底定燕京宣示朝鮮七月倭遣陪臣表賀貢方物十一月遣世子湍歸國敕減歲貢內蘇木二百斤茶十包綿綢千疋各色細布五千疋布四百疋蠶布二千疋順刀十把刀十把其元旦冬至萬壽慶賀貢物

以道遠俱於朝正時附進著爲令二年三月遣倅次子湔歸國十一月世子湔卒封倅次子湔爲世子三年十月免貢米六年正月以朝鮮年覲原定閣臣尙書各一員書狀官一員代之此後或閣臣尙書一員代覲書狀官仍舊六月李倅薨八月遣禮臣啟心郎渥赫等往諭祭賜諡莊穆又遣戶部啟心郎布丹侍衛撤爾岱充正副使齎誥勅往封世子湔爲朝鮮國王妻張氏爲王妃七年正月湔奏言日本近以密書示通事情形可畏請築城訓練爲守禦計遣使往訊慶尙道觀察使李舅東萊府盧協並言朝鮮日本素和好前奏不實詔切責湔覈其用事臣李敬輿李景奭趙洞等職九年正月湔表賀昭聖慈壽皇太后加上徽號五月國人趙照元等謀逆伏誅遣使奏聞十年三月以朝鮮國王印有清文無漢篆命禮部改鑄兼清漢字印賜之十二月封湔子欄爲世子十五年二月以羅剎犯邊諭朝鮮簡發烏槍手二百從征十六年五月李倅薨九月遣工部尙書郭科等往諭祭賜諡忠宣又遣大學士蔣赫德吏部侍郎覺羅博碩會充正副使往封世子欄爲朝鮮國王妻金氏爲王妃十八年聖祖卽位欄遣

陪臣進香賀登極康熙元年命朝鮮表賀冬至萬壽節及進歲貢與朝正之使  
偕行屢年國有大典俱遣使朝賀十三年十二月李樞薨諭禮部李樞克盡藩  
職可從優給卹典於常例外加祭一次賜諡莊恪遣內大臣壽西特侍衛桑厄  
恩克往諭祭兼封嗣子李焯爲朝鮮國王妻金氏爲王妃十五年十一月焯奏  
言前明十六朝紀一書中載本國癸亥年廢光海君李瑄立莊穆王李倬事誣  
以纂逆今聞纂修明史特陳奏始末乞刪改以昭信史禮部議不准行二十年  
正月王妃金氏故遣官致祭二十一年五月遣使封焯繼室閔氏爲王妃是年  
帝謁祖陵焯遣陪臣至盛京迎覲貢方物二十四年焯奏言國內牛多疫死民  
失耕種請暫停互市禮部議焯託言妄奏帝以外藩宥之仍令照常貿易二十  
五年朝鮮民韓得完等二十八人越江採蔴槍傷繪畫輿圖官役讞上斬韓得  
完等爲首六人餘免死減等發落焯奉表謝罪附貢方物帝以朝鮮王因謝罪  
進貢宜不收准作年貢嗣後謝罪貢物著停止三十年七月禮臣奏朝鮮國貢  
使違禁私買一統志書內通官張燦應革職發邊界充軍正使李沈副使徐文

重等失於覺察應革職帝命從寬免革職三十二年正月免朝鮮歲貢內黃金百兩及藍青紅木棉三十六年七月封煇子昀爲世子十一月煇疏請於江中貿易米糧允之三十七年正月遣侍郎陶岱運米三萬石往朝鮮以一萬石賑濟二萬石平糶有御製海運賑濟朝鮮記三十九年煇表謝發回漂入琉球船隻恩附貢方物帝諭軫卹漂人卻貢物嗣後有若此例者停其貢四十年十二月王妃閔氏故遣官致祭先是漁採船並貿易人至朝鮮往往侵擾地方至是諭王令查驗船票人數姓名籍貫開明報部轉行原籍地方官從重治罪並諭各撫嚴飭沿海地方官有以海上漁採貿易爲名往來外國販買違禁貨物者嚴行禁止四十一年遣員外郎鄧德監收中江稅以四千兩爲額四十二年二月遣使封煇繼室金氏爲王妃四十三年十二月煇遣官資送被風漂失商船降諭褒之四十五年十月諭大學士曰朝鮮國王奉事我朝小心敬慎其國間有八道北道接瓦爾喀地方土門江東道接倭子國西道接我鳳凰城南道接海外尚有數小島太宗平定朝鮮國人樹碑於駐軍之地頌德至今當明之末

年彼始終服事未嘗叛離實屬重禮義之邦猶爲可取四十九年五月朝鮮商人高道弼等被風壞船漂至海州獲救江蘇巡撫張伯行以聞諭令高道弼等由部給文馳驛歸國五十年五月帝諭大學士曰長白山之西中國與朝鮮既以鴨綠江爲界而土門江自長白山東邊流出東南入海土門江西南屬朝鮮東北屬中國亦以江爲界但鴨綠土門二江之間地方知之不悉乃派穆克登往查邊界十月帝諭免朝鮮國王例貢物內白金一千兩紅豹皮一百四十二張治朝鮮國使沿途館舍是年禮臣覆准朝鮮國與奉天府金州復州海州蓋州相近地方令盛京將軍奉天府尹嚴飭沿海居民不許往朝鮮近洋漁採或別地漁採人到朝鮮並皆捕送五十一年五月煇奏謝減例貢恩附貢方物帝命謝恩禮物准作冬至元旦禮物是年穆克登至長白會同朝鮮接伴使朴權觀察使李善溥立碑小白山上五十四年禮臣奏瑯春之庫爾喀齊等住處與朝鮮止隔土門江恐往來生事將安都立他木努房屋窩鋪悉行折毀嗣後沿邊近處不得蓋屋種地軍民違者重罪之五十七年三月煇表謝賜空青恩附

貢方物帝命留作下次正貢自是凡朝鮮奏謝附貢方物均留作正貢迄於光緒朝不改五十九年十月李煒堯遣散秩大臣查克賈禮部右侍郎羅瞻往弔祭賜設僖順兼封世子昀爲朝鮮國王繼妻魚氏爲王妃六十一年二月昀疏言臣萎弱無嗣請以弟李吟爲世弟以續宗祧帝俞其請四月遣使往封吟爲朝鮮國王世弟十二月山東漁戶楊三等十四人遭風漂入朝鮮審無信票送回內地帝命嗣後漂風船隻人口驗有票文未滋事者照舊送回如無票文復生事犯法者令王於審擬後咨部具題俟命下行文完結仍報部存案雍正元年七月諭禮部減朝鮮貢物內布八百疋獺皮百張青黍皮三百張紙二千卷朝鮮於九月內進萬壽表文仍照例於十二月與年貢並進昀遣陪臣進香賀登極二年五月昀遣陪臣上孝恭仁皇后尊諡十二月李昀堯遣散秩大臣覺羅舒魯翰林院學士阿克敦往諭祭賜設莊恪兼封世弟吟爲朝鮮國王妻徐氏爲王妃三年七月吟疏請封副室所生子李緯爲世子部議與例不符帝特如所請行八月遣官封吟子緯爲世子五年正月吟疏請更正先世臣僚誣逆



事部議吟四代祖倥故明天啟三年請封明十六朝紀以寡奪書實屬冤誣應予更正俟明史告成後以朝鮮列傳頒示其國從之商人胡嘉佩虧帑以朝鮮國民所負銀六萬兩呈抵令赴中江質明辦理部議吟咨文支飾請按數追償帝命從寬免追又諭吟追拏內地盜賊潛逃朝鮮者倘漏網不獲王將其國防汛之員參處王亦一併議處六年二月減朝鮮歲貢稻米江米各三十石每年止貢江米四十石以供祭祀著爲例十日吟請朝鮮盜賊潛入內地諭兵部檄盛京山東邊境官嚴拏究治七年正月世子絳卒遣官諭祭十月諭禮臣朝鮮國距京三千餘里貢使往來勞費嗣後凡謝恩章疏與聖壽冬至元旦三大節表同時齋奏不必特遣使臣著爲令八月吟爲嫂妃魚氏告哀遣使諭祭九年五月奉天將軍那蘇圖疏言鳳凰城邊外陸路防汛之虎耳山諸處有草河鑿河二水發源邊內至邊外之莽牛哨匯流入中江中江之中有洲名江心沱沱西屬鳳凰城東爲朝鮮國界歲有匪徒乘船出入請於莽牛哨設水師防汛帝以詢朝鮮王吟請仍遵舊例從之十年三月吟以先臣李倥被誣事蒙令史臣

改正乙早頒發諭先將明史朝鮮列傳抄錄頒示十三年九月高宗即位頒詔朝鮮諭禮臣曰大臣官員之差往朝鮮者向有餽食儀物之例其照舊例減半著爲令乾隆元年二月諭禮臣朝鮮國今年所進萬壽表貢例於十二月偕年貢同進由是歲以爲常二年四月吟奏請仍中江通市舊例每歲二八月間八旗臺站官兵資貨赴中江與朝鮮互市帝以旅人有巡守責且不諳貿易改令內地商民往爲市及吟奏入從之十一月吟請封其副室子愼爲世子時愼甫三歲部議格於例特旨允行三年正月遣使往封愼爲世子四年五月吟表謝頒給朝鮮列傳四年十一月盛京侍郎德福等疏言朝鮮漁船被風飄至海客界資送漁戶金鐵等由陸路歸國嗣後凡朝鮮民人被風漂入內地者俱給資護送歸國迄至光緒朝撫恤如例八年九月帝詣盛京吟遣使表貢特賜御書式表東藩扁額令使臣與諸王大臣宴十一年九月減中江稅額十三年五月盛京刑部侍郎達爾黨阿奏言十二年十二月朝鮮貢使過萬寶橋奴人士還以馬逸失銀詭稱迷路夜入人家誣執宋二等爲盜訊明照所誣罪加三等擬

杖徒帝諭從寬免罪又朝鮮國人李云吉誘脅女口越疆轉賣照例擬絞監候  
仍照乾隆五年定例入於秋審冊內覈擬具奏又朝鮮國王咨稱訓戎鎮越江  
東邊有烏喇民人造屋墾田禮臣議照康熙五十四年定例行令寧古塔將軍  
確察禁止毀其房屋其違禁民人及不行察禁之該管官照例辦理又奏朝鮮  
人入山海關所帶貨物如係彼國土產與鳳凰城總管印文相符及出關所帶  
貨物與本部割付相符免其輸稅此外如別帶物件及不係彼國所產者即照  
數按則輸稅儻有違買禁物監督查出報部治罪是年朝鮮國王咨稱日本關  
白新立照例通使禮臣奏復允之十四年七月奉天將軍阿蘭泰奏言向例朝  
鮮貢使到邊鳳凰城城守尉帶領官兵偕主客迎送通事等官至關門稽其人  
馬車輿輜重各數沿途設館舍嗣兵部侍郎德沛出使其國奏言置館非適中  
之所貢使人多不敷居住聽來使隨時賃住民居臣以貢使人數衆多若聽其  
賃住村莊恐多滋擾應請嗣後貢使到關驗入後務令合隊行走照舊例每站  
設官一員兵役二十人護送令地方官先期代備旅舍以資棲息晝則護行夜

則巡邏或貢使人役需置食物護行官檢其出入人數兵役隨往如內地人民與朝鮮人役生事兵役拿稟護行官付地方官究治至貢使人役惟迎送官與之相習應專責成倘地方官預備不周許護行迎送通事官揭報府尹照違令律議處迎送通事官沿途約束不嚴致貢使人役滋事許護行官揭報禮部照約束不嚴例議處護行官看守不嚴及兵役不足許迎送通事官揭報將軍照縱軍歇役律議處迎送通事官瞻徇容隱致擾居民或護行官縱容兵丁通同狗蔽許地方旗民官各揭報上司衙門照私結外藩例議處奏入報可十五年禮臣覆准朝鮮貢使入邊其行李及貿易貨物報明查驗車馬數目沿途按界委地方官催趲車輛與貢使同按程行走並於報單內註明經過日期如朝鮮員役有託故落後者責成迎送通事官如催趲車輛不力專責其管旗民地方官十九年九月帝謁盛京祖陵吟遣使表貢賞賜如例二十二年六月吟以其母金氏之喪來告王妃徐氏旋卒二十三年遣官諭祭四月大學士傅恆奏言朝鮮久爲屬國禮節語言均已嫻熟所設通事官請改爲八員從之二十五年

正月遣官封吟繼室金氏爲王妃二十八年朝鮮世子李愼卒遣官諭祭七月封故世子愼之子祿爲世孫二十九年三月朝鮮民人金鳳守金世柱等殺死內地披甲常德部議金鳳守造意應斬金世柱加功應絞至朝鮮奸民屢次越境生事皆王約束不嚴所致應交部議處帝諭金鳳守等從寬改爲監候王免議處吟以失於鈴束褫平安道觀察使鄭淳等職三十年五月吟以越江行竊人犯金順丁等俱入綏決案內疎防各官擬罪從寬遣使表謝三十六年八月吟奏朱璘明紀輯略陳建之皇明通紀載其先世之事因訛襲謬誣妄含冤請並行刊去禮臣議朱璘輯略浙江巡撫楊廷璋業經銷燬其陳建通紀京城書肆亦無售者若二書彼國或有流傳應令自行查禁焚銷四十一年李吟薨王妃金氏請以世孫算爲國王妻金氏爲王妃並請追賜故世子絳爵諡及世子婦趙氏誥命諭如所請遣散秩大臣覺羅萬福內閣學士嵩貴往諭祭賜吟諡曰莊順絳諡曰恪愍封祿爲朝鮮國王妻金氏爲王妃四十二年帝謁祖陵以不舉筵宴敕止朝鮮朝賀祿仍遣官齎表迎駕御書東藩繩美扁額賜之四十

五年祔遣正使吏曹判書徐有慶副使禮曹參判申大升奉表賀七旬萬壽貢方物四十八年帝謁祖陵祔遣陪臣至盛京迎覲所有朝貢宴賚一切典禮特加優渥並賜御製詩章及古稀說四十九年祔疏稱世子暉年三歲請封爲世子特旨遣使往封給與誥敕五十年正月舉行千叟宴祔遣正使安春君李彬副使吏曹判書李致中入貢預宴比於內臣帝聞祔好學能詩賞做米板五經全部並筆墨諸物因諭朝鮮歷年留抵貢物悉行收受以免輾轉積存嗣後隨表貢物概行停止五十一年七月世子暉病故遣官諭祭五十五年禮臣奏言朝鮮國王先因李暉病故今副室生男當卽爲奏請冊封不能拜跪行禮請待其稍長以永方來之福特旨允其國王所請七月祔遣正使黃仁黈副使徐浩修奉表賀八旬萬壽貢方物五十六年有法蘭西教士由中國往朝鮮傳天主教五十八年祔請換買錢貨回國通用部議不許嘉慶元年祔遣使賀太上皇帝歸政貢方物使臣在寧壽宮入千叟宴賜聖製千叟宴詩四年正月遣副都統張承勳禮部侍郎恒傑赴朝鮮頒大行太上皇帝遺詔祔遣使表賀上高宗

純皇帝尊諡貢方物留抵正貢五年遣使敕封李祘子瑛爲世子適李祘薨卽以册封世子之正副使往封李瑛爲朝鮮國王六年瑛以本國殄除金有山等潛傳洋教顛末臚章入告並稱餘孽未靖恐其潛入邊門請飭沿疆大吏嚴查究辦帝諭已飭沿邊大吏一體嚴查設經盤獲卽發交國王自行辦理十年帝詣盛京遣官接駕特賜禮教綏藩扁額十二年十一月朝鮮義州商人白大賢李士楫潛運米至獐子島與邊民朱張兩姓私市王將白大賢等監禁地方官革究並繳進錢文銅鐵等物帝以王恭順可嘉頒賞大緞四疋玻璃器四件雕漆器四件茶葉四瓶以示恩獎諭飭盛京將軍督飭沿邊官弁嚴緝朱張二姓查明內地疏防官員嚴行懲處十七年三月朝鮮義州土賊起派祿成督兵討之遣使敕封李瑛之子昖爲世子三十三年九月帝詣盛京瑛遣使迎覲表賀賜御製詩及福字道光元年瑛奏言伊曾祖李昀患痼疾經議政金昌集中樞李頤命左議政李健命判中樞趙泰采請以李昉爲世弟參決國政而相臣趙泰耆等誣金昌集四臣謀逆肆行誅戮幸蒙聖祖准李昉襲封趙泰耆等論罪

伏誅金昌集四臣咸獲昭雪而皇朝文獻通考載四臣謀逆事覺伏誅等語乞更正部議通考所載係據李昫奏報非纂修之譌今既籲懇爲祖雪冤應請刪去此條以昭信史從之二年頒給文獻通考刊正一編琮遣使表賀仁宗睿皇帝升配升祔暨上皇太后尊號徽號貢方物又因賞賜緞匹頒詔謝恩進皇帝皇太后前各貢物前三分收受餘九分留抵正貢又例貢外並賀冊諡孝穆皇后又爲賜祭謝恩進皇帝皇太后前各貢物前二分收受後三分留抵正貢八年琮遣使表賀平定回疆又爲頒給敕書暨加賞緞疋謝恩貢方物俱留抵正貢九年朝鮮國副使呂東植在榆關病故賜銀三百兩十一年琮奏請封嫡孫李奐爲世孫帝俞所請遣使齎敕封李奐爲朝鮮國王世孫十二年琮奏英吉利商船駛入朝鮮古代島要求通市嚴拒之相持旬餘英船始去帝獎其忠賜緞匹十五年李琮薨王妃金氏請以世孫李奐襲封因爲故世子具陳請追賜爵諡及世子婦誥命二月遣使諭祭賜琮諡宣恪贈故世子吳爲國王諡康穆妻爲王妃敕封世孫奐爲朝鮮國王奐表賀冊立皇后暨上皇太后徽號貢方



物十六年倭表賀皇太后六旬萬壽加上徽號貢方物禮部議准朝鮮使臣來京禁從人在館外貿易十七年遣使敕封僖正室爲王妃十九年倭表進大行皇后前貢物三分發還二十二年諭禁內地人民私越邊界構舍墾田二十四年朝鮮國王妃薨遣使賜祭二十五年遣使敕封僖繼室爲王妃向例派往朝鮮使臣帶通官五六員至是減至一員永爲定例是年禮部奏據朝鮮國王咨稱英船屢泊其境量山測水並問答中有交易之詞帝命耆英詳詢英使遵照成約婉言開導不得復任兵船游弋致滋驚擾二十九年李倭薨諭祭如例十月命瑞常和色本齎敕往封僖子昇爲朝鮮國王咸豐元年昇以伊祖李裨於嘉慶辛酉年間羅入其國邪黨案內爲其戚臣金龜柱等誣陷以死恐內府編載其事懇辨其誣禮部奏稱當日上諭暨會典所載並無李裨之名昇以先世被誣備陳枉抑實屬爲人後者之至情應如所請許其昭雪從之昇表賀上孝和睿皇后暨宣宗成皇帝尊諡貢方物二年遣使敕封李昇妻爲王妃昇表賀孝德皇后册立禮成貢方物均留抵正貢帝飭盛京將軍並沿海督撫嚴禁內

地民船至朝鮮漁採三年昇表賀宣宗成皇帝升祔升配並頒給詔書謝恩貢  
方物命留抵正貢而受其表賀册立皇后禮成貢物四年朝鮮國人張添吉私  
來京帝命送交其國查辦五年朝鮮國護送美國難民四名至京帝命遞至江  
南交兩江總督查訊令附該國商船回國六年昇表賀上孝靜康慈皇后尊諡  
貢方物收受七年禮臣奏准朝鮮帶來紅銅四千餘觔聽在會同四譯館交易  
帝諭越界之朝鮮人金益壽解送盛京禮部轉解鳳凰城交其國查收訊辦十  
一年二月帝幸熱河昇遣使奉表詣行在恭申起居帝諭使臣到京後無庸前  
赴行在禮部仍照例筵宴並賜昇如意緞正瓷器漆器同治元年昇遣使表賀  
登極呈進兩宮皇太后貢物二分均收受其賀登極貢物一分又頒詔賜緞謝  
恩進皇帝貢物二分兩宮皇太后貢物四分均留抵正貢二年昇表賀上文宗  
顯皇帝尊諡並上兩宮皇太后尊號徽號暨頒詔賞緞謝恩各貢物五分收受  
其十一分留抵正貢是年昇奏稱先世被誣懇將謬妄書籍刊正帝諭朝鮮國  
王先系源流與李仁任即李仁人者族姓迥別我朝纂修明史於其國歷次辨

雪之言無不備載今昇因見康熙年間鄭元慶所撰廿一史約編記載其國世系多誣顛請刊正約編所稱康熙王爲李仁人之子實屬外誤惟係在明史未修以前村塾綴緝之士見聞未確不免仍沿明初之訛今其國奉有特頒史傳自當欽遵刊布使其子孫臣庶知所信從約編一書在中國久已不行亦無所用其改削著各省學政通行各學查明曉諭凡朝鮮事實應以欽定明史爲正不得援前項書籍爲據以歸盡一而昭信守三年禮臣奏准朝鮮國慶源地方官議修兩國交易官房越圖們江擇偏僻地採取材木十月李昇薨遣使齎敕往封李熙爲朝鮮國王倬九世孫也五年俄羅斯兵艦抵朝鮮元山等處力請通商九月法蘭西水師提督魯月率兵艦入漢江抵漢城礮擊數船毀一礮臺而去十月法艦再抵江華島進陷其城掠銀十九萬佛郎朝鮮募獵虎手八百名襲之乃遁先是國王李熙年幼其生父大院君李是應執國政惡西教下令嚴禁虐待天主教徒至是法國聲其罪無功而還熙表賀文宗顯皇帝升祔太廟貢方物留抵正貢遣使敕封熙正室閔氏爲王妃七年二月侍郎延煦等奏

接見朝鮮委員並查勘鳳凰鰲陽兩邊門外大概情形帝諭恭親王會同大學士等公同商議恭親王等奏稱查勘各處私墾地畝已無大段閒荒而朝鮮所慮全在民物凋雜欲除凋雜之弊在乎邊境之嚴復經親王等會同延煦奕榕酌商展邊一切事宜並請飭盛京將軍會同原勘之延煦等悉心查辦帝卽派延煦奕榕馳驛前往奉天會同都興阿出邊查辦諭曰事當初始必綱舉而目始張且與外藩交涉尤應禁令修明方能垂諸久遠前次延煦接見之朝鮮使臣所設問答均極明晰足見國王深明大體即著禮部傳知朝鮮國王俟報勘定議後務須嚴飭其國邊界官一體遵守九年九月朝鮮國王稱其國慶源府農圃社民李東吉逃往琿春蓋屋墾田嘯聚無賴籲懇查拿帝諭敏福密飭琿春協領等購緝緝盡數拿獲解交其國懲治是歲朝鮮大雨雹國內荒飢餓孳載道民人冒犯重禁渡圖們江至琿春諸處乞食求生是爲朝鮮流民越墾之始帝諭朝鮮國王將民人悉數領回約束並自行設法招徠嚴申禁令不可復蹈前轍尋有美國商船駛至朝鮮大同江附近攔淺朝鮮人見之誤爲法船

大肆劫掠十一年熙遣使表賀大婚加上兩宮皇太后徽號貢方物是年美國水師提督勞直耳司率二鐵甲兵艦抵朝鮮江華島毀礮臺三座以報劫掠商船之役十二年熙遣使表賀親政加上兩宮皇太后徽號貢方物光緒元年朝鮮國撥舟濟渡凱撤官兵賜熙緞匹熙遣使進香賀登極貢方物俱留抵正貢發還朝鮮進穆宗毅皇帝萬壽聖節冬至元旦令節各貢物照例留抵正貢熙請封世子貢方物帝允所請其進獻禮物准留抵正貢尋遣使齎勅往封李圻爲朝鮮國王世子又諭奉省押解朝鮮進香貢物之佐領恩倖驍騎校塔隆阿於五月初三日接領至六月初五日始行起行擅改由水路行走兩月之久尙未到京難保無藉端需索情事恩倖塔隆阿均先行革職並著崇實等查明從重參辦二年熙遣使表賀上穆宗毅皇帝及孝哲毅皇后尊諡又表賀加上兩宮皇太后徽號貢方物俱留抵正貢是年朝鮮與日本立約通商先是同治十一年日本外務卿副島種臣來北京議約乘間詰問總理各國事務衙門朝鮮是否屬國當代主其通商事答以朝鮮雖藩屬而內政外交聽其自主我朝向

不預聞元年日本迺以兵力脅朝鮮突遣軍艦入江華島燬礮臺燒永宗城殺朝鮮兵劫其軍械而去別以軍艦駐釜山要盟而遣開拓使長官黑田清隆爲全權大臣議官井上馨副之赴朝鮮議約至是定約十二條大要認朝鮮爲獨立自主國禮儀交際皆與日本平等互派使臣并開元山仁川兩埠通商及日艦得測量朝鮮海岸諸事三年朝鮮以天主教事與法國有違言介駐釜山日本領事調停書稱中國爲上國有上國禮部並聽上國指揮等語日本大詰責以交際平等何獨尊中國如朝鮮爲中國屬則大損日本國體朝鮮上其事總理衙門致書日本辨論略曰朝鮮久隸中國而政令則歸其自理其爲中國所屬天下皆知卽其爲自主之國亦天下皆知日本豈得獨拒五年七月軍機大臣寄諭北洋大臣直隸總督李鴻章密勸朝鮮與泰西各國通商諭曰總理各國事務衙門奏泰西各國欲與朝鮮通商事關大局等語日本朝鮮積不相能將來日本恃其詐力逞志朝鮮西洋各國羣起而謀其後皆在意計之中各國曾欲與朝鮮通商僅藉此通好修約庶幾可以息事俾無意外之虞惟其國政

教禁令亦難強以所不欲據總理衙門奏李鴻章與朝鮮使臣李裕元曾經通信略及交鄰之意自可乘機婉爲開導俾得未雨綢繆潛弭外患六年九月鴻章遵旨籌議朝鮮武備許朝鮮派人來天津學習製造操練命津海關道鄭藻如等與朝鮮齎奏官下元奎擬具來學章程奏聞七年二月鴻章奏言朝鮮國王委員李容肅隨今屆貢使來京於正月二十日赴津稟謁據稱專爲武備學習事並齎呈其國請示節略一本內載有領議政李是應奏章頗悔去年六月堅拒美國來使爲非計末則歸重於及今之務莫如懷遠人而安社稷等語又索中國與各國修好立約通商章程稅則帶回援照其國軍額極虛餉力極絀誠慮無以自立而所據形勢寔爲東三省屏蔽關係甚重現其君相雖幡然變計有聯絡外邦之意國人議論紛歧尙難遽決自應乘機開誠曉諭冀可破其成見固我藩籬惟其國於外交情事生疏卽如與日本通商五年尙未設關收稅並不知稅額重輕設再與西國結約勢必被欺無益有損臣因令前在西洋學習交涉之道員馬建忠與鄭藻如等參酌目今時勢及東西洋通例代擬朝

鮮與各國通商章程底稿豫爲取益防損之計交李容齋齋回俾其國遇事有所據依至其節略所詢各例條內惟答覆日本國書稱謂一節僅稍涉含混即於屬邦體例有碍臣查西洋各國稱帝稱王本非一律要皆平等相交朝鮮國王久受我冊封其有報答日本及他國之書應令仍用封號國政雖由其自主庶不失中國屬邦之名也禮部議准朝鮮學習製器練兵等事發給空白憑票徑由海道赴津以期便捷至貢使來京仍遵定例辦理先是光緒初元吉林鄂多哩開放荒田朝鮮茂山對岸外六道溝諸處間有朝鮮人冒禁私墾者漸次蔓延至是吉林將軍銘安督辦邊防吳大澂奏言據琿春招墾委員李金鏞稟稱土門江北岸山下嘎牙河至高麗鎮約二百里有閒荒八處前臨江水後擁羣山向爲人跡不到之區與朝鮮一江之隔其國邊民屢被水災連年荒歉無地耕種陸續渡江開墾已熟之地不下二千晌其國窮民數千人賴以餬口有朝鮮咸鏡道刺史發給執照分段注册等語臣等查吉林與朝鮮毗連之處向以土門江爲界今朝鮮貧民所墾閒荒在江北岸其爲吉林轄境無疑邊界曠



土豈容外藩任意侵佔惟朝鮮寄居之戶墾種有年並有數千餘衆若照例嚴行驅逐出界恐數千無告窮民同時失所殊堪憐憫擬請飭下禮部咨明朝鮮國王派員會同吉林委員查勘明確劃清界址所有其國民人寄居戶口已墾荒地懇恩准其查照吉林向章每晌繳押荒錢二千一百文每年每晌完佃地租錢六百六十文由臣銘安飭司給領執照限令每年冬季應交租錢就近交至琿春由放荒委員照數收納或其國鑄錢不能出境議令以牛抵租亦可備吉省墾荒之用其咸鏡道刺史所給執照飭令收回銷毀從之十二月鴻章奏言本年正月總理衙門因屢接出使日本大臣何如璋函述朝鮮近日漸知變計商與美國立約請由中國代爲主持擬變通舊制嗣後遇有朝鮮關係洋務要件由北洋大臣及出使日本大臣與其國通遞文函相機開道奉旨知照臣維朝鮮久隸外藩實爲東三省屏蔽與琉球孤懸海外者形勢迥殊今日日本既滅琉球法國又據越南沿海六省中國已有鞭長莫及之勢我藩屬之最親切者莫如朝鮮日本脅令通商復不允訂稅則非先與美國訂一妥善之約則朝

鮮勢難孤立各國要求終無已時東方安危大局所繫中朝即不必顯爲主張而休戚相關亦不可不隨時維持多方調護八年三月朝鮮始與美國議約請蒞盟鴻章奏派道員馬建忠水師統領提督丁汝昌率威遠揚威鎮海三艘會美國全權大臣薛裴爾東渡四月初六日約成美使薛裴爾朝鮮議約官申樞金宏集盟於濟物浦汝昌建忠監之十四日陪臣李應浚齎美朝約文並致美國照會呈禮部及北洋大臣代表未幾英使水師提督韋力士法駐津領事狄隆德使巴蘭德先後東來建忠介之皆如美例成約是役也日本亦令兵輪來調約事其駐朝公使花房義質屢詰約文朝鮮不之告乃叩建忠建忠秘之曰人滋不悅六月朝鮮大院君李是應煽亂兵殺執政數人入王宮將殺王妃閔氏魯王及世子不得與朝士通並焚日本使館在朝鮮練兵教師堀本禮造以下七人死焉日使花房義質走回長崎時建忠汝昌俱回國鴻章以憂去張樹聲署北洋大臣電令建忠會汝昌率威遠超勇揚威三艘東渡觀變二十七日抵仁川泊月尾島而日本海軍少將仁禮景範已乘金剛艦先至朝鮮臣民惶

懼望中國援兵亟建忠上書樹聲請濟師速入王京執逆首緩則亂深而日人得逞損國威而失藩封汝昌亦內渡請師七月初三日日兵艦先後來仁川陸兵亦登岸分駐仁川濟物浦花房義質且率師入王京初七日中國兵艦威遠日新泰西鎮東拱北至繼以南洋二兵輪凡七艘蓋樹聲得朝鮮亂耗即以聞遂命提督吳長慶所部三千人東援便宜行事以兵輪濟師是日登岸十二日薄王京十三日長慶汝昌建忠入城往候李是應減騶從示坦率是應來報謁遂執之致之天津而亂黨尙踞肘腋十六日黎明營官張光前吳兆有何乘鰲掩至城東枉尋里擒百五十餘人長慶自至泰利里捕二十餘人亂黨平日使花房義質入王京以焚館逐使爲言要挾過當議不行義質惡聲去示決絕朝鮮懼介建忠留之仁川以李裕元爲全權大臣金宏集副之往仁川會議卒許償金五十萬元開楊華鎮市埠推廣元山釜山仁川埠行程地宿兵王京凡八條隱忍成約自是長慶所部遂留鎮朝鮮方李是應之執歸天津也帝命俟李鴻章到津會同張樹聲向是應訊明變亂之由及著名亂黨具奏至是究明李

是應乃國王本生父秉政十年及王年長親政王妃閔氏崇用親屬分是應權是應怨望六月初間閔謙鎬分給軍餉米不滿斛軍人與胥役詰門謙鎬囚軍卒五人將置諸法軍人奔訴於是應遂變初九日殺閔謙鎬金輔紘李最應等是應入闕曉諭諸軍自稱國太公總攬國權亦不捕治亂黨鴻章奏言此次變亂雖由軍卒索餉然亂軍赴是應申訴如果正言開導何至遽興大難朝鮮臣庶皆謂是應激之使變卽謂此無左證而亂軍圍擊宮禁王妃與難大臣被害兇殘已不可嚮爾李是應既能定亂於事後獨不能遏亂於方萌況乘危竊柄一月有餘春秋之義人不討賊片言可折百喙難逃儻再釋回本國奸黨構煽怨毒相尋重植亂萌必爲後患伏查朝鮮史略元代高麗王累世皆以父子構殺延祐年間高麗王諒既爲上王傳位於其子叅交構諉隙元年流諒於土蕃安置王父俱有前事又至元年間叅子忠惠王名禎亦經元帝流於揭陽縣其時高麗國內晏然徒以宵小浸潤遠竄窮荒今李是應無蒙產垂統之尊有幾危社稷之罪較諫禎等情節尤重惟處人家國父子之間不能不兼籌並顧儻

蒙加恩勅下臣等將李是應安置近京之保定省城永遠不准復回本國優給廩餼護其出入嚴其防閑仍准其國王派員省問以慰其私既以弭其國禍亂之端亦即以維其國倫紀之變帝俞其言乃幽是應保定舊清河道署是年鴻章奏定朝鮮通商章程八條一由北洋大臣札派商務委員前往駐紮朝鮮亦派大員駐津照料商務二朝鮮商民在中國各口財產罪犯等案悉由地方官審斷遵會典舊例三朝鮮平安黃海道與山東奉天等省濱海地方聽兩國漁船往來捕魚不得私以貨物貿易違者船貨入官四准兩國商民入內地採辦土貨照納沿途釐稅五訂鴨綠江對岸柵門與義州二處又圖門江對岸琿春與會甯二處聽邊民往來交易設卡徵稅罷除館宇餼廩芻糧等費六申明嚴禁之物紅葭一項照例准售酌定稅則七派招商局輪船每月定期往返一次由朝鮮政府協商船費若干八豫計增損之處隨時商辦禮部奏准停止會甯慶原地方監視交易惟本年輪屆會甯交易之期恐彼處商民無官約束別滋事端應由盛京將軍奉天府尹吉林將軍就近派員會同朝鮮官妥爲經理熙

表賀孝貞顯皇后升祔恭進慈禧皇太后貢物九年熙表賀崇上孝貞顯皇后  
尊諡恭進慈禧皇太后貢物其因亂黨滋事出兵東援並派兵衛護謝恩貢方  
物留抵正貢十年朝鮮維新黨亂作初朝鮮自立約通商後國中新進輕躁喜  
事號維新黨目政府爲守舊黨相水火維新黨首金玉均洪英植朴泳孝徐光  
範徐載弼謀殺執政代之五人者常游日本哢日人至是倚爲外援十月十七  
日延中國商務總辦及各國公使並朝鮮官飲於郵署蓋英植時總郵政也是  
日駐朝日兵運槍礮彈藥入日使館及暮賓皆集惟日使竹添進一郎不至酒  
數行火起亂黨入傷其國禁衛大將軍閔泳翊殺朝官數人於座外賓驚散夜  
半日本兵排門入景祐宮金玉均朴泳孝徐光範直入寢殿挾其王謬言中國  
兵至矯令速日本入衛十八日天明殺其輔國閔臺鎬趙寧夏總管海防閔泳  
穆左營使李祖淵前營使韓圭稷後營使尹泰駿而亂黨自署官英植右參政  
王均戶曹參判泳孝前後營使光範左右營使載弼前營正領官遂議廢立議  
未決而勤王兵起十九日朝鮮臣民籲長慶平亂長慶責日使撤兵及暮不答

其臣民固請長慶兵赴王宮及闕日兵集普通門發槍長慶疑國王在正宮恐傷王未還擊而日兵連發槍斃華兵甚夥乃進戰於宮門外王乘間避至後北關廟華軍偵知之遂以王歸於軍斬洪英植及其徒七人以徇沐孝光範載弼奔日本日使自焚使署走濟物浦朝民仇日人益甚長慶衛其官商妻孥出王京朝鮮具疏告變帝命吳大澂爲朝鮮辦事大臣續昌副之赴朝鮮籌善後日本亦派全權大臣井上馨至朝鮮有兵艦六艘並載陸軍登濟物浦以五事要朝鮮一修書謝罪一恤日本被害人十二萬圓三殺太尉林璣之凶手處以極刑四建日本新館朝鮮出二萬元充費五日本增置王京戍兵朝鮮任建兵房朝鮮皆聽命成約十一年正月日本遣其宮內大臣伊藤博文農商務大臣西鄉從道來天津議朝鮮約帝命李鴻章爲全權大臣副以吳大澂與議諭曰日本使臣到津李鴻章熟悉中外交涉情形必能妥籌因應此次朝鮮亂黨滋事提督吳兆有等所辦並無不合前據徐承祖電稱日人欲我懲在朝武弁斷不能徇曲其請其餘商議各節務當斟酌機宜與之辯論隨時請旨遵行三月約

成鴻章奏言日使伊藤博文於二月十八日詣行館會議當邀同吳大澂續昌與之接晤其使臣要求三事一撤回華軍二議處統將三償恤難民臣惟三事之中惟撤兵一層尙可酌允我軍隔海遠役本非久計原擬俟朝亂略定奏請撤回而日兵駐紮漢城名爲護衛使館今乘其來請正可乘機令彼撤兵但日本久認朝鮮爲自主之國不欲中國干涉其所注意不在暫時之撤防而在永遠之輟戍若彼此永不派兵駐朝無事時固可相安萬一朝人或內亂強鄰或有侵奪中國即不復能過問此又不可不熟思審處者也伊藤於二十七日自擬五條給臣閱看第一條聲明嗣後兩國均不得在朝鮮國內派兵設營其所注重實在於此臣於其第二條內添註若他國與朝鮮或有戰爭或朝鮮有叛亂情事不在前條之列伊藤於叛亂一語堅持不允遂各不懌而散旋奉三月初一日電旨撤兵可允求不派兵不可允萬不得已或於第二條內添叙兩國遇有朝鮮重大事變可各派兵互相知照至教練兵事一節亦須言定兩國均不派員爲要臣復恪遵旨意與伊藤再四磋商始將前議五條改爲三條第



一條議定兩國撤兵日期第二條中日均勿派員在朝教練第三條朝鮮變亂重大事件兩國或一國要派兵應先互行文知照及其事定仍即撤回不再留防字斟句酌點易數四乃始定議夫朝廷瞻念東藩日人潛師襲朝疾雷不及掩耳故不惜糜餉勞師越疆遠戍今既有互相知照之約若將來日本用兵我得隨時爲備卽西國侵奪朝鮮土地我亦可會商派兵互相援助此皆無礙中國字小之體而有益於朝鮮大局者也至議處統將償卹難民二節一非情理一無證據本可置之不理惟伊藤謂此二節不定辦法旣無以復君命更無以息衆忿亦係實情然我軍保護屬藩名正言順誠如聖諭謂提督所辦並無不合斷不能曲徇其請因念駐朝慶軍係臣部曲姑由臣行文戒飭以明出自己意與國無干譬如子弟與人爭鬥其父兄出爲調停固是常情至伊所呈各口供謂有華兵殺掠日民情事難保非彼藉詞但旣經其國取有口供正可就此追查如查明實有某營某兵上街滋事確有見證定照軍法嚴辦以示無私絕無賠償可議也以上兩節卽由臣照會伊藤俾得轉圜完案遂於初四日申刻

彼此齊集公所將訂立專條逐細校對公同畫押蓋印各執一本爲據謹將約本封送軍機處進呈御覽恭候批准臣等稟承朝謨反覆辯析幸免隕越以後彼此照約撤兵永息爭端俾朝鮮整軍經武徐爲自固之謀並無傷中日兩國和好之誼庶於全局有裨也由是中國成朝鮮兵遂罷歸是年吉林設通商局於和龍峪設分卡於光霽峪西步江專司吉林與朝鮮通商事又設越壑局劃圖們江北沿岸長約七百里寬約四十五里爲越壑專區當光緒己卯間俄人以伊犁故將失和遣兵艦駛遼海英人亦遣兵艦踞朝鮮之巨文島以尼俄人旣而伊犁約成英人慮擾東方大局冀中國始終保護朝鮮屢爲總署言之十二年出使英法德俄大臣劉瑞芬致書鴻章言朝鮮毗連東三省關係甚重其國奸黨久懷二心飲鳩自甘已成難治之症中國能收其全土改行省此上策也其次則約同英美俄諸國共相保護不准他人侵佔寸土朝鮮亦可倖存鴻章雖之上之總署不可議遂寢是年釋李是應歸國熙奉表謝恩貢方物留抵正貢十三年鴻章遵旨籌議朝鮮通使各國體制奏言電飭駐紮朝鮮辦理交

涉通商事宜升用道補用知府袁世凱轉商伊國應派駐紮公使不必用全權字樣旋於九月二十三日接據袁世凱電稟准朝鮮外署照稱奉國王傳教前派各使久已束裝如候由咨文往返籌商恐須時日請先電達北洋大臣籌覆並據其國王咨稱近年泰西各國屢請派使修聘諸國幅員權力十倍朝鮮不可不派大公使惟派使之初未諳體制未先商請中朝派定後即飭外署知照各國以備接待茲忽改派深恐見疑仍請准派全權公使前往待報聘事竣調回或以參贊等員代理庶可節省經費並飭使至西國後與中國大臣仍恪遵舊制等語辭意甚爲遜順臣復加籌度更將有關體制者先爲約定三端一韓使初至各國應請由中國大臣挈赴外部一遇有燕會交際應隨中國大臣之後一交涉大事關緊要者先密商中國大臣核示並聲明此皆屬邦分內之體制與各國無干各國不得過問當卽電飭袁世凱轉達國王照辦茲復准王咨稱於十月杪飭駐美公使樸定陽駐英德俄意法公使趙臣熙先後前往所定三端並飭遵行臣查朝鮮派使往駐泰西其國原約有遣使互駐之條遂未

先商請中國遽以全權公使報聞各國此時慮以改派失信自是寔情既稱遣使後與中朝使臣往來恪遵舊制臣所定擬三端又經遵行於屬邦事例並無違礙是年吉林有朝鮮勘界之案十六年總理衙門疏言吉林將軍奏稱朝鮮流民佔墾吉林邊地光緒七年經將軍銘安督辦邊防吳大澂奏將流民查明戶籍分歸琿春及敦化縣管轄嗣因朝王懇請刷還流民咨由禮部轉奏經將軍覆准予限一年由伊國地方官設法收回復因限滿而流民仍未刷還反縱其過江侵佔經將軍希元咨由總理衙門奏准派員會勘乃其國始誤以豆滿圖門爲兩江繼誤指內地海蘭河爲分界之江終誤以松花江發源之黃化松溝子有土堆如門附會土門之義執意強辯續經希元派員覆勘石乙水爲圖門正源議於長水分界繪具圖說於十三年十一月奏奉諭旨咨照國王遵辦在案乃國王不加詳攷遽信勘界使李重夏偏執之詞堅請以紅土山水立界齟齬難合然未便以勘界之故遂置越墾爲緩圖現在朝鮮茂山府對岸迤東之光齊哈六道溝十八崴子等地方韓民越墾約有數千地約數萬晌此處既

有圖們江天然界限自可毋庸再勘其國邊延至今斷難將流民刷還應亟飭令領照納租歸我版籍先行派員清丈編甲升科以期邊民相安等語臣等查吉林朝鮮界務前經兩次會勘其未能即定者特茂山以上直接三汲泡二百餘里之圖們江源耳至茂山以下圖們江巨流乃天然界限江南岸爲朝鮮咸鏡道屬之茂山會寧鍾城慶源慶興六府地方江北岸爲吉林之敦化縣及琿春地方朝鮮勘界使亦無異說韓民越墾多年廬墓相望一旦盡刷還數千人失業無依其情實屬可矜若聽其以異籍之民日久佔住主客不分殊非久計且近年墾民疊以韓官邊界徵租種種苛擾赴吉林控訴經北洋大臣李鴻章咨臣衙門有案現在江源界址旣難尅日劃清則無庸勘辦處所似宜及時撫綏擬請飭下將軍遴派賢員清丈升科領照納租歸地方官管轄一切章程奏明辦理於是將軍長順頒發執照韓民願去者聽其自便願留者薙髮易服與華人一律編籍爲氓墾地納租是年熙母妃趙氏薨遣使奉表來訃曰朝鮮國王臣李熙言臣母趙氏於光緒十六年四月十七日薨逝謹奉表訃告臣李熙

誠惶誠恐頓首稽首伏以小邦無祿肆切哀悼之忱內艱是丁恭申訃告之禮臣無任望天仰聖激切屏營之至謹奉表告訃以聞告訃正使洪鍾永等爲懇恩事竊以小邦祇守藩服世沐皇恩壬午甲申之交綱常得以扶植土宇賴以廓清尤屬恩深再造自經喪亂洊遭饑饉民物流離六七年來艱難日甚近又不幸康穆王妃薨逝舉朝哀戚無計辦擋主上念王妃遭兵構憫八域困窮向例喪祭之需出自閭閻者不得不一概蠲免以舒民力故凡喪祭俱從儉約惟念大皇帝欽差頒敕自昔異數時恐星使賁臨禮節儼有未周負罪滋甚與其抱疚於將來孰若陳情於先事況天恩高厚有願必償久如赤子之仰慈父母矣爲特敬求部堂俯鑒實情摺奏天陛儼有溫諭頒發俾職敬謹齎回免煩星使之處出自逾格恩施不勝急切兢懼之至禮臣奏聞帝諭曰朝鮮告訃使臣具呈懇請免遣使賜奠一摺所陳困苦情形自非虛飾惟國王世守東藩備叨恩禮弔祭專使載在典常循行勿替此天朝撫恤屬藩之異數體制攸關豈容輕改特念朝鮮近年國用窘乏異常不得不於率循舊章之中曲加矜恤向來

遣使其國皆由東邊陸路計入境後尙有十餘站沿途供億實繁此次派往大員著改由天津乘坐北洋輪船徑至仁川登岸禮成仍由此路回京如此變通則道途甚近支應無多所有向來陸路供張繁費悉行節省至欽使到國以後應行典禮凡無關冗費者均應恪遵舊章不得稍事簡略將此諭由禮部傳諭國王知之九月遣戶部左侍郎續昌戶部右侍郎崇禮往諭祭十九年朝鮮償日本米商金先是十五年秋朝鮮饑其咸鏡道觀察使趙秉式禁糶及次年夏弛禁日人謂其元山埠米商折本銀十四萬餘元責償朝鮮朝鮮爲能秉式官許償六萬日人至三易公使以爭至是卒償十一萬事乃解初中國駐朝道員袁世凱以吳長慶軍營務處留朝充商務總辦兼理交涉事宜時朝鮮倚中國其執政閔泳駿等共善世凱泳駿閔妃族也素嫉日本而國中新黨厚自結於日人甲申朝鮮之難金玉均朴泳孝等挾資逃日本而李逸植洪鍾宇分往刺之鍾宇英植子痛其父死玉均手欲得而甘心佯交歡玉均二十年二月自日本偕乘西京丸商輪船游上海同寓日本東和旅館二十二日鍾宇以手槍擊

殺王均中國捕鍾宇漿之以詰朝鮮朝人謂王均叛黨鍾宇其官也請歸其獄  
自讞許之朝鮮超賞鍾宇五品官戮王均屍而以鹽漬其首日本大譁乃爲王  
均發喪假葬執紼者數百人會逸植亦刺泳孝於日本未中日人處逸植極刑  
日朝交惡且怒中國歸王均屍四月朝鮮東學黨變作東學者創始崔福成刺  
取儒家佛老諸說轉相衍授起於慶尙道之慈仁縣蔓延忠清全羅諸道當同  
治四年朝鮮禁天主教捕治教徒並擒東學黨首喬姓殺之其黨卒不衰泊上  
年徑赴王宮訟喬冤請湔雪不許旋擒治其渠數人乃急而思逞朝鮮賦重刑  
苛民多怨上黨人乘之遂倡亂於全羅道之古阜縣朝鮮王以其臣洪啟勳爲  
招討使假中國平遠兵艦蒼龍運給自仁川渡兵八百人至長山浦登岸赴全  
州初戰甚利黨人逃入白山朝兵蹙之中伏大敗喪其軍大半賊由全羅犯忠  
清兩道兵皆潰遂陷全州會城獲槍械藥彈無算榜全州城以匡君救民爲名  
揚言即日進公州洪州直搗王京朝鮮大震急電北洋乞援師鴻章奏派直隸  
提督葉志超太原鎮總兵聶士成率蘆榆防兵東援屯牙山縣屯山值朝鮮王



京西南一百五十里仁川澳左腋沔江口也五月電諭駐日公使汪鳳藻按光緒十一年條約告日本外部以朝鮮請兵中國顧念藩服遣兵代平其亂日本外務卿陸奧宗光復鳳藻文謂貴國雖以朝鮮爲藩服而朝鮮從未自稱爲屬於貴國乃以兵北渡命其駐京公使小村壽太郎照約告於中國總署復文謂我朝撫綏藩服因其請兵故命將平其內亂貴國不必特派重兵且朝鮮並未向貴國請兵貴國之兵亦不必入其內地日使覆文謂本國向未認朝鮮爲中國藩屬今照日朝濟物浦條約及中日兩國天津條約派兵至朝鮮兵入朝鮮內地亦無定限朝鮮亂黨聞中國兵至氣已懾初九日爲朝兵所敗棄全州遁朝兵收會城亂平而日兵來不已其公使大島圭介率兵四百人先入王京後隊繼至從仁川登岸約八千餘人皆赴王京朝鮮驚愕止之不可中國以朝亂既平約日本撤兵而日人要改朝鮮內政其外部照會駐日使臣約兩國各簡大臣至朝代其更革鳳藻復文謂整頓內治任朝鮮自爲之即我中國不願干預且貴國既認朝鮮爲自主之國豈能預其內政至彼此撤兵中東和約早已

訂有專條今可不必再議而日人持之甚堅時日兵皆據王京要害中國屯牙山兵甚單世凱屢電請兵鴻章始終欲據條約要日撤兵恐增兵益爲藉口英俄各國使臣居間調停皆無成議鴻章欲以賠款息兵而日索銀三百萬兩朝論大譁於是和戰無定計而日本已以兵劫朝鮮日使大島圭介首責朝鮮獨立六月圭介要以五事一舉能員二制國用三改法律四改兵制五興學校朝鮮爲設校正廳示聽命十四日朝鮮照會日使先撤兵徐議改政不許復責其謝絕爲中國藩屬朝鮮以久事中國不欲棄前盟駐京日使照會總署文略謂朝鮮之亂在內治不修若中日兩國合力同心代爲酌辦事莫有善於此者萬不料中國悉置不講但日請我國退兵兩國若啟爭端實惟中國執其咎遂徧布水雷漢江口以兵塞王京諸門十七日袁世凱赴仁川登輪回國二十一日大島圭介率兵入朝鮮王宮殺衛兵遂劫國王李熙令大院君李是應主國事矯王令流閔泳駿等於惡島凡朝臣不親附者逐之事無鉅細皆決於日人二十三日鴻章電令牙山速備戰守乃奏請以大同鎮總兵衛汝貴率盛軍十三

營發天津盛京副都統豐紳阿統盛京軍發奉天提督馬玉崑統毅軍發旅順  
高州鎮總兵左寶貴統奉軍發奉天四大軍奉朝命出師慮海道梗乃議盡由  
陸路自遼東行渡鴨綠江入朝鮮時牙山兵孤懸不得四大軍消息而距牙山  
東北五十里成歡驛爲自王京南來大道且南通公州士成請於志超往扼守  
遂率武毅副中營老前營及練軍右營於二十四日移駐成歡鴻章租英商高  
陞輪載北塘防軍兩營輔以操江運船載械援牙山兵輪三艘翼之而東而師  
期預洩遂爲所截三輪逃回威海操江懸白旂任掠去日艦吉野浪速以魚雷  
擊高陞沉之兩營殲焉是日牙山軍聞之知援絕而日人大隊已逼士成請援  
於志超二十六日志超馳至迎戰失利二十七日日兵踞成歡以礮擊我軍勢  
不支遂敗志超已棄公州遁士成追及之合軍北走繞王京之東循清鎮州忠  
州槐山興塘涉漢江經堤川原州橫川狼川金化平康伊川遂安祥源渡大同  
江至平壤與大軍合匝月始達七月初一日諭曰朝鮮爲我大清藩屏二百餘  
年歲修職貢爲中外共知近十年其國時多內亂朝廷字小爲懷疊次派兵前

往勘定並派員駐紮其國都城隨時保護本年四月間朝鮮又有土匪變亂國王請兵援剿陳詞迫切當即諭令李鴻章撥兵赴援甫抵牙山匪徒星散乃日人無故添兵突入漢城嗣又增兵萬餘迫令朝鮮更改國政我朝撫綏藩服其國內政事向令自理日本與朝鮮立約係屬與國更無以重兵強令革政之理各國公論皆以日本師出無名不合情理勸令撤兵和平商辦乃竟悍然不顧迄無成說反更陸續添兵朝鮮百姓及中國商民日加驚擾是以添兵前往保護詎行至中途突有敵船多隻乘我不備在牙山口外海面開礮轟擊傷我逆船殊非意料所及日本不遵條約不守公法釁開自彼公論昭然用特布告天下俾曉然於朝廷辦理此事實已仁至義盡勢難再與姑容著李鴻章嚴飭派出各軍迅速進剿厚集雄師陸續進發以拯韓民於塗炭蓋中國至是始宣戰也是時中國軍並屯平壤爲固守計八月初日兵既逼諸將分劃守界城北面左寶貴所部奉軍豐紳阿之盛軍江自康之仁字兩營守之城西面集志超所部蘆防軍守之城南而迤西南隅衛汝貴之盛軍守之城東面大同江東岸馬

王崑之毅軍守之復以左賓貴部分統諸桂林策應東南兩面志超駐城中調度賓貴駐城北山頂守元武門諸將各以守界方位駐城外十六日日兵分道來撲巨礮逼攻各壘相繼潰城遂陷賓貴力戰中礮死志超率諸將北走軍儲器械公牘密電盡委之以去諸士咸以安州山川險峻宜固守志超不聽奔五百餘里渡鴨綠江入遼止焉自是朝鮮境內無一華兵朝事不可問矣二十一年三月馬關條約成其第一款中國確認朝鮮爲完全無缺獨立自主之國凡前此貢獻等典禮皆廢之蓋自崇德二年李倬歸附朝鮮爲清屬國者凡二百五十有八年至是遂爲獨立自主國云

琉球在福建泉州府東海中先是明季琉球國王尙賢遣使金應元請封會道阻留閩中清順治三年福建平使者與通事謝必振等至江甯投經略洪承疇送至京禮官言前朝敕印未繳未便受封四年賜其使衣帽布帛遣歸是年尙賢卒弟尙質自稱世子遣使奉表歸誠十年遣使來貢明年再遣貢使兼繳前朝敕印請封允之詔曰帝王祇德應治協於上下靈承於天薄海通道罔不率

俾爲藩屏臣朕懋續鴻緒奄有中夏聲教所綏無間遐邇雖炎方荒略不忍遣  
棄爾琉球國粵在南徼乃世子尙質達時誠勢祇奉明綸既令王舅馬宗毅等  
獻方物稟正朔抒誠進表繳上舊詔敕印朕甚嘉之故特遣正使兵科副理官  
張學禮副使行人司行人王垓齎捧詔印往封爲琉球國中山王爾國官僚及  
爾氓庶尙其輔乃王飭乃侯度協抒乃忠肅慎又厥職以凝休綿祉於奕世故  
茲詔示咸使聞知賜王印一綬幣三十四匹妃綬幣二十四匹並頒定貢期二年一  
貢進貢人數不得逾一百五十名許正副使二員從人十五名入京餘俱留閩  
待命旣而學禮等至閩因海氛未靖仍掣回康熙元年勅曰琉球國世子尙質  
慕恩向化遣使入貢世祖章皇帝嘉乃抒誠特頒恩賚命使兵科副禮官張學  
禮等齎捧勅印封爾爲琉球國王乃海道未通滯閩多年致爾使人率多物故  
朕念爾國傾心修貢宜加優恤乃使臣及地方官逗留遲悞均未將前情奏明  
殊失朕懷遠之意今已將正副使督撫等官分別處治特頒恩賚仍遣正使張  
學禮副使王垓令其自贖前非暫還原職速送使人歸國一應勅封事宜仍照

世祖章皇帝前旨奉行朕恐爾國未悉朕意故再降勅諭俾爾聞知於是學禮等奉往至其國成禮而還三年質遣陪臣吳國用金正春奉表謝封貢方物四年再遣貢使並賀登極其貢物至梅花港口遭風漂失帝諭免其補進五年質仍遣貢使補進前失貢物帝諭曰尙質恭順可嘉補進貢物俱令齎回至所進瑪瑙烏木降香木香象牙錫速香丁香檀香黃熟香等皆非土產免其入貢其琉璜留福建督撫收貯餘所貢物令督撫差解來京即給賞遣歸六年貢使仍齎表入覲八年重建柔遠館驛於福建以待琉球使臣是年王尙質薨八年世子尙貞遣陪臣英常春來貢琉球國凡王嗣位先請朝命欽命正副使奉勅往封賜以駝紐鍍金銀印乃稱王未封以前稱世子權國事十年十三年世子貞均遣陪臣來貢十八年貞遣陪臣補進十七年正貢舊例貢物有金銀罐金銀粉匣金缸酒海泥金彩畫圍屏泥金扇泥銀扇畫扇蕉布苧布紅花胡椒蘇木腰刀火刀鎗盔甲馬鞍絲綿螺盤加貢之物無定額十九年陪臣來貢帝俱令免進嗣後常貢惟馬及熟硫磺海螺殼紅銅等物二十年貞遣陪臣毛見龍等

來貢帝以貞當耿精忠叛亂之際屢獻方物恭順可嘉賜敕褒諭兼賜錦幣十五又常貢內免其貢馬著爲例貞疏言先臣尙質於康熙七年薨逝貞嫡嗣應襲爵具通國臣民結狀請封禮臣議航海道遠應令貢使領封見龍等固請禮臣執不可帝特允之二十一年命翰林院檢討王楫內閣中書舍人林麟煇爲正副使齎詔敕銀印往封琉球國世子尙貞爲王賜御書中山世土額禮成還京奏言中山王尙貞願令陪臣子弟四人來京受學部議前明永樂洪武宣德成化間琉球官生入監讀書今尙貞傾心向學應如所請從之貞遣陪臣毛國珍王明佐等謝封奏言前代封使奉命後每遲至三四年甚有十餘年而後臨臣國者今使臣汪楫林麟煇朝拜命而夕就道且當海疆多故之時衝風冒險而臣國又僻在海東封舟開駕恃西南風以行中道無可倚泊常兼旬經月而後至甚水米俱盡事不可言今在五虎門開洋僅三晝夜而達小國臣遣官迎護親見舟行之次萬鳥繞篷而飛兩魚夾舟而進經過之處浪靜波平倏抵琉球內地通國臣民以爲僅見仰惟皇上文德功烈格天感神且有御筆在船故



徵應若此也乞宣付史館以彰嘉瑞又疏請飭令使官收受所辭宴金帝命收受二十五年貞遺官生梁成楫蔡文溥阮維新鄭秉鈞四人入太學附貢使船遭風桅折傷秉鈞飄至太平山修船二十七年二月始至京師十月貞遺陪臣來謝子弟入監讀書恩並貢方物帝令成楫等三人照都通事例日廩甚優四時給袍袷衫袴襪帽被褥咸備從人皆有賜又月給紙筆銀一兩五錢特設教習一人令博士一員督課二十八年貞疏言舊例外國船定數三艘貨物得免收稅今琉球進貢船止二艘尚有接貢船一艘未蒙免稅請照例免收以足三船之數又人數例帶一百五十人萬里汪洋駕舟人少不能遠涉乞准加增禮臣議免入貢船稅人數不准加增帝特令加增至二百人三十二年貞遺陪臣來貢請入監讀書官生歸國賜宴及文綺乘傳厚給遣歸自是二年一貢如常例四十八年琉球國內多災宮殿焚燬颶風頻作人畜多死是年王尙貞薨世子尙純先卒四十九年尙純子尙益以嫡孫立五十一年卒未及請封五十二年尙益世子尙敬立比年遣使入貢稱世曾孫五十七年六月命翰林院檢討海

寶編修徐葆光充正副使往封琉球國世曾孫尙敬爲王五十八年琉球國建明倫堂於文廟南謂之府學擇久米大夫通事一人爲講解師月吉設聖諭衍義三六九日紫金大夫詣講堂理中國往來貢典察諸生勤惰籍其能者備保舉八歲入學者擇通事中一人爲訓詁師教之文廟在久米村泉崎橋北創始於康熙十二年廟中制度俎豆禮儀悉遵會典琉球自入清代以來受中國文化頗深故慕效華風如此五十九年琉球國王尙敬疏請續送官生入監讀書從之雍正二年敬遣陪臣王舅翁國柱及曾信等奉表賀登極貢方物兼送官生鄭秉哲鄭繩蔡宏訓等入監讀書帝召見國柱等御書輯瑞球陽額賜王並玉器緞幣等物交國柱齎回官生蔡宏訓病卒賜銀百兩交禮官擇近京地葬之並以二百兩贍卹其家三年敬遣使表謝方物帝命准作二年一次正貢四年敬遣使入貢並進謝表方物命存留作六年正貢其六年表文俟八年正貢時併進是年貢使歸附官生鄭秉哲等歸國六年敬仍遣使入貢帝命作八年正貢若八年貢使已經起程卽准作十年正貢八年敬遣使入貢疏言請遵舊

制二年一貢不敢愆期帝諭仍遵前旨行若十年貢物已遣使起程卽准作十二年正貢十一年不必遣使乾隆二年六月琉球所屬之小琉球國有粟米棉花二船遭風飄至浙江象山浙閩總督稽曾筠資給衣糧遣還事聞帝諭嗣後被風漂泊之船令督撫等加意撫恤動用存公銀兩資給衣糧修理舟楫查還貨物遣歸本國著爲令三年敬遣陪臣奉表賀登極並貢方物帝命貢使齎回御書永祚瀛壖頒賜王並諭不必專使謝恩俟正貢之年一同奏謝五年敬遣使入貢並進謝恩方物六年禮臣議琉球謝恩禮物照雍正四年例准作二年一次正貢從之五月浙江提督裴斌奏言江南商民徐准華等五十三人遭風飄入琉球之葉壁山國王資遣都通事阮爲標護送歸國帝命禮臣傳旨獎之十五年敬遣通事阮超羣等送回十四年被風失舟之商民吳永盛等四船九十二人其林士興等六船一百三十人先已撥給桅木原價資送回閩事聞賜敕綬正十六年福建巡撫潘恩架奏言琉球貢使毛如苞等貢船遇颶飄還本局今修葺補進又前有閩縣遭風船戶蔣長興等常熟縣商民瞿長順等三十

九人留養兩年今亦隨船回閩奉旨嘉獎是年王尙敬薨十九年世子尙穆遣使入貢兼請襲封二十年命翰林院侍讀全魁編修周煌充正副使往封琉球國世子尙穆爲王二十四年穆遣使入貢並遣官生梁文治等入監讀書帝命所進方物准作二十五年正貢是年資送遭風商民金任之照屋等五十三人回國以後迄於光緒朝凡琉球遭風難民皆撫卹如例二十九年遣官生梁文治等歸國四十九年穆遣陪臣毛廷棟等入覲行慶賀禮御書海邦濟美額賜之並賜玉磁緞匹諸物五十五年穆遣使入貢並進謝恩方物懇恩免抵正貢帝命如所請行五十八年諭軍機大臣琉球貢船現距年節兩月有餘即飭伴送員按程從容行走祇須封篆前到京便與年班各外藩同與宴資五十九年穆遣使謝特賜福字如意恩貢方物是年王尙穆薨世子尙哲先卒世孫尙溫權署國事嘉慶三年世孫尙溫遣使入貢兼請襲封是年尙溫建國學於王府北又建鄉學三國中子弟由鄉學選入國學四年命翰林院修撰趙文楷編修李鼎元充正副使往封琉球國世孫尙溫爲王賜御書海表恭藩額五年尙溫

遣陪臣子弟四人入監讀書七年琉球那霸官民集資請於王建鄉學四八年琉球二號貢船至大武崙洋遭風漂至臺灣衝礁擊碎其正貢船亦同時漂沒福州將軍王德等以聞帝諭救獲官伴水稍人等照常例加倍給賞貢物無庸另備呈進十二年王尙溫薨世子尙成署國事未及受封病卒七月命翰林院編修齊鯤工科給事中費賜章往封世孫尙灝爲王是年琉球接貢船復遭風沈沒帝命給銀千兩作僱船資用另給銀五百兩卹淹斃六十三人家屬道光二年琉球貢船至閩頭外洋遭風擊碎溺死貢使十名帝命給銀千兩僱商船回國免另備貢物又琉球遭風難夷米喜阜等每名日給鹽菜口糧俟回國之日另給行糧一月七年琉球國王尙灝遣使入貢並謝賜御書恩貢方物呈懇免抵正貢允之十七年王尙灝薨遣使往封世子尙育爲王十九年尙育遣使謝册封及賞御書貢方物又疏請飭使臣受宴金帝不允令來使齋回初琉球舊例間歲一貢上年改爲四年朝貢一次二十年十一月其國王額請照舊允之其陪臣子弟四人准隨同貢使北上入監讀書琉球國小而貧逼近日本惟

侍中國爲聲援又貢舟許蠶販各貨免徵關稅舉國侍以爲生其資本多貸諸日本國中行使皆日本寬永錢所販各貨運日本者十常八九其數數貢中國非惟恭順亦其國勢然也二十六年琉球入監官生向克期回國途中病故卹銀三百兩咸豐元年琉球國王世子尙泰遣使賀登極貢方物懇免留抵允之帝諭軍機大臣曰琉球恪守藩封前以英人伯德令住居伊國久未撤回頻來呼籲當經飭令徐廣縉曉諭文安委婉開導令其撤回文安設詞推諉該督仍當隨時體察情形加意控馭三年賜琉球御書同文式化額四年琉球世子遣使慶賀冊立大典貢方物時賊氛逼東南郵傳多阻諭令使臣無庸繞道來京卽由閩回國使臣仍懇入都帝命王懿德等俟來歲道路疏通派員護送八年琉球入監官生毛啟祥途中病故賜卹銀三百兩九年琉球貢使到閩帝以貢使遠涉輸誠命王懿德等察看情形如閩省上游及江浙諸省道路已通卽派員伴送來京十年琉球入監官生葛兆慶病故營葬張家灣賜卹金如例同治三年琉球國世子遣使賀登極貢方物是年英人與日本構釁將襲取琉球駐

海軍事尋解五年遣使齎敕印往封琉球世子尙泰爲王六年尙泰遣陪臣子弟四人入監讀書十年有琉球船遭風漂至臺灣爲生番劫殺者五十四人十一年復劫殺日本小田縣難民四人日本大譁既中日立約天津要求痛懲生番卹琉球日本死難諸人且言琉球爲日本版圖藉口稱兵臺灣語具外交志光緒元年琉球國貢使蔡呈祚回國病沒山東賜葬費銀五年日本入琉球滅之夷爲沖繩縣虜其王及世子而還總理衙門以滅我藩屬詰日本口人拒焉六年帝命北洋大臣李鴻章統籌全局鴻章奏言琉球原部三十六島北部九島中部十一島南部十六島而周迴不及三百里北部中有八部早屬日本僅在一島去年日本廢滅琉球中國疊次理論又有美前總統格蘭忒從中排解始有割島分隸之說此時尙未知南島之枯瘠也本年日本人竹添進一來津謁見稱其政府之意擬以北島中島歸日本南島歸中國又議改前約臣以琉球初廢之時中國體統攸關不能不極與理論今則俄事方殷勢難兼顧且日人要索多端允之則大受其損拒之則多樹一敵惟有暫從緩議因傳詢在京

之琉球官尙德宏始知中島物產較多南島貧瘠僻隘不能自立而琉球王及其世子日本又不肯釋還適接出使大臣何如璋來書復稱詢訪琉球國王謂如宮古八重山小島另立三子不止吾家不願圖國臣民亦斷斷不服南島地瘠產微向隸中山政令由土人自主今欲舉以畀琉球琉球人反不敢受我之辦法亦窮等語臣思中國以存琉球宗社爲重本非利其土地今得南島以封琉球而琉球不願勢不能不派員管理既蹈義始利終之嫌且以有用之兵餉守甌脫不毛之地勞費正自無窮而道里遼遠實有孤危之慮若憚其勞費而棄之不守適墜人狡謀且恐西人踞之經營掣肘扼我太平洋咽喉亦非中國之利是不議改約而僅分我以南島猶恐進退兩難致貽後悔今之議改前約儻能竟釋琉球國王畀以中南兩島復爲一國其利害尙足相抵或可勉強允許不然彼享其利我受其害且並失我內地之利輒所不取也臣愚以爲日本議結琉球之案暫宜緩允由是琉球遂亡